

續修鎮番縣志

卷九上  
月

續修鎮番縣志卷之九

人物列傳<sup>上</sup>

名臣<sup>無</sup>

名將<sup>無</sup>

忠烈

傅培峰字擘三清道光丁未進士官江西宜黃知縣咸豐八年髮逆擾境親率鄉團晝夜督禦數月糧盡援絕城陷乃朝服北向再拜自經氣未絕賊至脅之降培峰大罵目眦盡裂賊怒甚支解焚毀之事聞給予

續修鎮番縣志

卷九

人物列傳上

一

雲騎尉世職宜黃建立專祠宜人歐陽暉有殉難

紀畧

藍毓青字雲峰清道光甲午舉人官大通奇臺固原安定諸縣教諭訓諸生先植品而後文藝諄諄誥誡肄業學署者多有其人辛酉定西文武兩解元皆出門下俸滿保薦定西士民攀轅挽留遂回原任明年回亂毓青同官紳練勇防守同治四年奉文截取知縣四月逆回環攻城固守多日圍始解上官以防守出力保加同知銜六年四月初六日夜賊由西南角援梯跨城郭外駐紮十五營不能相救毓青急與都司

秦某督民登陴力戰死之事聞優卹如例子鴻茨副  
貢官甘州府教授

按士窮乃見節義傅藍二公皆書生也一旦出膺民  
社當勅敵猖獗掃境來寇一時守土諸公或納欵迎  
降或縋城潛逃偷活苟生食焉而避其難充然無復  
廉恥之色者皆是也二公獨激揚士氣登陴固守以  
孤城就盡之卒堵千百日滋之師雖力盡援絕明知  
無濟然猶揮戈奮擊寧為玉碎不為瓦全觀其衣冠  
北向罵賊粉身大呼力戰親蹈白刃忠肝義膽至今

懍懍有生氣以視庸奠之夫臨難倉皇束手坐困及  
潰敗決裂遂託於明哲保身以覩顏人世聞二公之  
風其亦可以少愧矣

忠義

丁人文字寅階清咸豐壬子舉人少負異才有文名同  
治元年大挑二等丁憂家居回變起督辦鄉團聞警  
往援所至奏捷四年大股回至民勇瓦解胸受矛傷  
死之

楊凌雲本城人武生性剛正貌魁梧工騎射刀石應童

子試列前矛清同治元年回亂就地練勇防守聞凌雲有勇知方公薦教練鄉團四年回倏至南河口凌雲分帶堵禦雙執銅錘不避鋒刃被殺回數十奈鄉勇未經戰遇敵輒北凌雲力不支被回亂刺而亡謝玉榮武生本城人幼充營卒前從征新疆浙江等處有膽氣同治四年回變起隨游擊陶某防堵南河口遇賊直衝賊陣斬首擐旂所向披靡賊怒甚以千騎壓左右攢刺而死

楊作梅武舉本城人弟得霈凌雲皆武生分帶本邑馬

步練勇防堵有功同治四年大股回至逼縣界兄弟率所部堵禦南河口凌雲死之作梅攬十二傷十年賊大隊襲城至聶家夾道作梅得霈出戰直衝賊鋒伏發皆死事聞優卹如例詳省志

劉耀材同治四年攜家避難十里墩上墩側屯庄即劉氏故宅被賊焚燬凡祖像家範俱成灰燼材痛甚凭堞燃礮擊之賊發飛彈折股而死

馬秀義文生起業之子體偉力壯膽略過人幼習騎射嘗於弓馬之暇務韜略演武藝凡所用軍器均鑄奮

勇爭先等字同治四年回犯境由冰渡河游擊陶某帶兵民禦寇時秀義分防西南鄉聞警急率所部星夜迎敵至紅崖山之南賊已踰河秀義縱馬揮刀督師拒戰賊稍却乃領驍卒數人直劈賊陣旋復合圍秀義輪刀舞鞭奮力砍擊賊怒分兩翼來衝民兵被賊擊潰全軍覆沒秀義督帶十餘人且戰且走退過山頭又被賊衆截取前路腹背受敵秀義衝突酣戰馳驅河干冰滑馬蹶亂予攢刺竟亡於陣

王見賓同治五年五月率民團駐羊路口防禦賊至衆

畏之紛紛瓦解各不相救見賓被執拷掠苦楚卒罵賊遇害同時死者六十餘人

盧旺枝西鄉龍王廟人同治五年七月回攻寨瀕陷者數旺枝督衆戰直衝陣賊盡辟易遂揮戈亂刺冀擒其酋時因蹉跌被執至長沙竊令作間諜為偷襲計旺枝唾罵且握拳奮擊賊怒甚遂被害子逢治從九職銜孫殿樞增生

李鳴鶴歲貢柳湖人同治五年五月賊遇途中見其被服儒雅誘聘教讀不從遂罹害子九成侄家銘痛父

叔死邀賊力戰亦被害

曾 第文生柳林湖人同治五年五月率衆禦賊賊銳甚衆皆潰走第與族隣十二人同被害

李啟純武生柳林湖人與弟文生啟書練鄉團千餘名到處救援同治五年五月同交戰自朝至午斬首三百餘勇潰力疲兄弟陣亡

丁世材柳林湖人同治五年逆回襲庄衆皆逃散世材因戰守無資舉家十餘口恐被賊污俱吞毒自焚

桂含芳監生柳林湖人同治五年督辦團練擊賊於馬

湖灘賊銳甚團勇死者千餘人含芳與監生柴耀洋任四劉中揚柴耀斗薛四串段有嘉等俱被害

程朝鐸監生柳林湖人同治五年回蜂至率弟朝福朝鼎朝臣朝秦侄興科孫宗舜宗堯協力戰守力疲均死之

劉國華文生柳林湖人同治五年回攻寨衆潰寨陷國華與子弟五六人被賊執拷掠索銀國華給曰盡釋我子弟則指示銀穴賊信之即時開放國華乃厲聲忿罵賊怒燃辮焚死

劉雙元增生優才學儀表俊偉設館授徒嘗講以節義為先同治七年回破寨雙元冠服立寨前罵賊遂遇害子奮武孫殿元俱入庠

馬在埭字堯衢增生充南鄉民勇團長同治八年八月逆回竄境在埭壽已登耄猶倔强如少年率衆守寨七日夜水漿不入口力疲難支賊誘降在埭虬髯倒束怒皆欲裂厲聲大罵賊怒擁梯猱升在埭計窮遂整服北拜闔室自焚事聞給予恩騎尉世職

王錫年西鄉人同治八年十二月賊突至圍其莊父母

幾危錫年在外聞之急偕堂叔永儒堂兄寶年執挺往救擊奪賊矛復傷數賊賊稍卻父母乘間奔寨酣戰時肩忽中槍遂同永儒寶年被賊支解成泥

陳廷彩千一糧人同治八年九月賊攻寨穴牆擁梯度力不支急令家中男女服毒舉火自焚

高廷秀六壩人同治八年回匪竄擾見防守單弱輒被覆巢因連絡三寨鄉勇禦賊屢挫其鋒賊積忿欲得而甘心督攻四晝夜寨陷猶挺槍立門力戰固拒衆皆梯垣而脫被執不屈賊揭巨石壓身聲色愈厲遂

遇害

景瑞雲庠生六壩人同治八年賊攻寨勢垂危人情洶  
洶叔侄議欲逃生瑞雲曰父生我生父死我死事已  
至此舍父安往寨陷父子均遇害

郭明海紅沙梁人同兄弟明山明通築堡禦賊同治八  
年回壓境攻圍甚急明海恐堡陷受辱坐藥籠自焚  
死明山撲火自盡明通被擒索賄無以應賊縛懸梁  
上燃薪熏灼而斃

馬多運西鄉人同治八年回攻寨與趙進中用木壘火

槍屢挫賊鋒越三日糧盡力疲賊誘之降許男女縋  
牆出不戮一人衆皆繫繩緣壁紛紛脫逃二人誓死  
不去梭巡堅守及被執燃火焚死

馬元德南鄉人同治八年守寨禦賊晝夜週巡目不瞋  
賊乘梯及堞即以利刃刺之顛如此者數次賊計窮  
乃夤夜掘牆穿隧道襲破之元德出奔見父在途被  
擒執挺往救遂中槍死

白永森狀貌魁偉性好武同治八年充義勇從遊擊韓  
庭芝禦賊於唐家灣賊誤為庭芝環圍陣亡



王大本城北街人同治九年回夜襲城由西北隅登  
陣先殺更夫取柝代擊衆賊蜂擁聚堞人無知者大  
成聞覺提刀上城大呼賊至及官民聞警馳禦城上  
大成已被賊傷死矣左右以火槍夾攻復以劈山礮  
仰擊賊遂退城無害

劉毓桂雙茨科人同治九年弟毓玠廩生設館寨旁隨  
學童赴塾賊適至毓桂見戈矛亂刺挺身接鬪弟獲  
免毓桂遂被害

邱隱奎柳林湖人性豪俠有膽略同治九年賊至猖獗

衆惶恐待斃隱奎率衆迎擊身受多傷血跡淋漓猶  
力戰不屈死

劉 汕北鄉人聞回變築寨堵禦同治九年多賊來犯  
寨破被執忿罵擊賊賊支解之僅存頭顱

陳廷炳千一糧人同治九年賊攻寨乘梯及堞廷炳以  
利劍刺墜或迎腦擊之殺傷數賊晝夜週巡不敢少  
懈力竭被執身壓木梃斬首而死

許世增東鄉人同治四年辦理鄉團禦賊於南河口勇  
潰陣亡蒙卹雲騎尉世職

曾毓哲東鄉人同治九年回犯境寨陷衆皆潰走毓哲以老母病重眷戀不去遂被執罵賊激怒倒懸樹下火爇鞭箠數日死之

韓克昌監生柳林湖人武舉有鶴父同治九年賊至劉家寨率衆力戰不勝死之

韓有鶴武舉柳林湖人同治九年賊圍馮家寨人情洶懼幾不自守有鶴急選敢死士與賊角逐奮力轉戰冀取勝以安衆心及中槍死人皆奪氣寨陷避難男女約在一千多人盡遭屠戮事聞給予雲騎尉世職

楊燦榮南鄉人庠生生員集鳳父同治十年賊至率衆禦賊寨陷遇害集鳳悲憤往復仇亦被害

劉能閱柳林湖人同治十年賊乘狂風潛至寨下時丁壯出耕能閱隻身守禦力竭被害

何鎮殿東鄉人聞回亂約同志捐貲築堡同治十年賊突環攻三日夜不下賊佯退乘堡內人民出外汲水遂襲陷之縱火焚掠鎮殿及子永亨均被害

朱升俊文生東鄉人回變寨破急整服北拜自行舉火一家七口均焚死事聞男人昭忠祠女人節孝祠並

淮襲雲騎尉世職

許世眷字田秋歲貢生東鄉龍台人學問深博尤工制藝鄉試數不利遂教授鄉里同治四年回犯境世眷合張興然等集貲築寨又練絡多人為防堵計九年大股回至力戰不支寨陷遂罵賊不屈死

張興然東鄉人同治九年回至圍寨多日合貢生許世眷文生許立文曾遴許立豪等力疲不支寨陷均被難同時死者無數

高得時東鄉人逆回變率子侄築寨捍禦人依之如長

城後寇大至堅守數日力竭被執不屈死之

魏光明字曉天優廩生北鄉人同治六年賊犯境光明帶鄉團救圍於大灘堡被賊掩執不屈而亡事聞優

卹如例

孫起甲潘永岱紅沙梁人回變鄉人訂立協約互相救援適花寨溝陳家寨被圍起甲帶團往救遇賊奮力轉戰殺傷甚夥及敗衄起甲被擒身帶彈藥賊搜獲之恨甚遂剖腹揭心而去永岱係起甲甥見舅被擒急往救之同被害

左附同治回變殉難紳民

柳克為庠生程謨之父同治四年從忠義勇禦賊於南河口勇潰陣亡

李玉青同治四年充練勇禦賊於南河口軍潰陣亡

薛世祥六壩人性寬厚遇事敢為同治四年禦賊殉難時年七十三歲人以壯勝奇之

馬服戎文童副團總秀義子同治四年被回擄不屈死楊夢楷上大路人充團總同治四年率勇禦賊於南河口與其子含芳及俞多業等十一人均亡於陣

王時中西鄉人生平規行矩步鄉人咸雅重之同治四年回至大靖時中約衆築堡以備不虞賊至四面環攻寨幾陷時中率衆出戰力不支被執不屈死子永玉文生孫廷萼歲貢生

張兆祥南鄉人同治四年回入境率衆堵禦同張受祥等十三人均殉難

劉耀仁南鄉人同治四年賊寇境率衆力戰衆潰耀仁挺身直前手刃一賊終被害

丁論文柳林湖人同治五年賊至奮身力戰被刺而亡

閔有三歲貢生清同治四年回猝至率堂弟學三猶子  
作綰作綜作組等與賊力戰盡死於賊

石奮揚武生同治四年領鄉團堵賊於南河口酣戰

之死

嚴吉祥本城人同治四年以團長帶鄉勇駐南河口防  
堵遇賊奮戰殺獲甚衆身受槍傷死之

郭印儒帶義勇堵禦於南河口以步擊騎直陷陣揮矛  
亂刺力盡不屈死

王貢瑞以商首往南河口襄辦軍糧民勇被賊衝散貢  
瑞獨隨團總奮戰身中槍死

馬浴德童生南鄉人同治四年父在塋率勇禦回遂被  
衝散浴德執殳尋父力戰而死

竇嘉祥南鄉人同治四年隨官軍禦賊於南河口偕弟  
五祥均陣亡

薛世孝武生六壩人同治四年禦賊於南河口官軍潰  
散隻身反鬪遂亡於陣

張爾蔚字霞起南鄉人舉人從仁父同治四年逆回擾  
至南鄉堡陷爾蔚赴火死之

柳克讓本城人性剛方好拳勇刀矛之藝同治三年逆

回擾河西克讓從軍四年出兵涼州陣亡

毛元仁南鄉人同治四年賊犯境一人提戈獨當數次力不支身受多傷死之

王季鼈西鄉人同治五年與子朝賢朝元家居操作賊突至圍莊三人竭力捍衛經夜不降賊怒併力急攻父子俱遇害

康以年蔡旗堡人同治五年充鄉勇往柳林湖救援被賊衝散遂死於難

王在楊增生蔡旗堡人同治五年回入室罵賊不屈死

於難

劉克鐸文生柳林湖人同治五年五月回至村衆皆紛逃全家服毒而死

盛萬久柳林湖人同治五年禦賊於抹山衆潰而亡

侍天祿柳林湖人同治五年率衆禦賊於西山力戰

而亡

羅祥翠柳林湖人素有膽略同治五年率衆禦賊力竭

不支腹中槍死

李天申柳林湖人同治五年被賊擄去因拷掠索金罵賊不屈死之

張吉樑柳林湖人同治五年五月率衆禦賊於馬湖灘  
力戰而亡

高發穎柳林湖人廩生廷勳父由邑庠授鄉飲大賓優  
文學教授里塾從遊多名士同治五年殉回難時年  
七十五

李起淑庠生柳林湖人性堅強有膽氣同治五年率鄉  
團禦賊於遐令溝賊鋒甚衆潰遂被害

李時潤東鄉人充團勇同治五年五月賊臨城奉縣諭  
率鄉勇禦賊遂被害

馬理調南鄉人同治五年五月與王保紀率衆禦賊於  
南鄉均力戰死

王榮德東鄉人同治五年五月被賊襲執不屈死之

朱紹賢東鄉人同治五年十二月禦賊力戰遂被害

王繼紀東鄉人同治五年回攻王家台甚急繼紀竭力  
防禦台陷死之

聶苞彥東鄉人字竹溪歲貢生毓旻仲子父歿奉母以  
孝同治五年拜掃祖墓遇回力戰被害

樊農生把總恆之父南鄉人同治六年七月督辦河工

遇賊被害時年八十一歲

趙新年西鄉人同治六年十月賊圍寨率子弟溝衆多人拒戰力竭同被害

趙生珏南鄉人同治六年十一月從西山運煤遇賊被執不屈死之

徐仕和南鄉人同治六年十月與子集慶同衆守寨賊環攻仕和率衆力戰遂遇害

劉耀棋南鄉人同治七年赴省饋糧途遇賊來劫耀棋悉將所馱之糧盡棄泥淖中賊怒甚遂刺死於道

周曰清監生北鄉人性剛直同治七年回攻寨陷之被

懸梁上箠擊索財曰清罵不絕口卒遇害

魏繼萬西鄉人初因河水屢潰無敢防堵者繼萬膽略

過人常率衆築堤農家賴之七年赴河督工遇賊被害

樊成德庠生同治八年遊勇嘯聚咆哮索糧時因賊匪

劫掠十室九空猝無以應勇遂圍寨令出成德而甘

心焉成德忍棄身家竟死於勇同時七八人均遇害

王心俊寺兒溝人同治八年賊攻寨力擊數賊傷之攻

愈急自知不免同心善等多數人舉火自焚



李登成同治八年充義勇禦賊於小西河陣亡

張迎仁六品軍功南鄉人同治八年回攻寨率衆堅守  
三日夜不暇火食寨陷被害

楊榮玠西鄉曹城溝人充團勇同治八年出隊於唐家  
灣陣亡

馬理祿南鄉人同治八年賊攻寨同王元春陳有培楊  
新文等率衆出戰賊稍却理祿等追之被賊槍擊而

韓有鷄監生柳林湖人同治八年率衆擊賊被賊攝去  
拷掠索金與之數千猶無厭有鷄奪金擊其腦斃之

從賊見金以戈亂刺而亡

陳興符柳林湖人壽逾七旬同治八年賊圍寨三日破  
之被難者三百餘人興符為賊所擄不屈死之

馬在壩武庠南鄉人同治八年率衆築堡為保衛計至  
八月賊突至蜂擁環攻在壩同族叔勳運胞弟在型  
努力防守三日夜不火食及堡陷力屈遂與叔弟均  
遇害

李時盛西鄉人同治八年賊夜襲寨同族弟時黨向昏  
暗中揮刀擊刺手刃數賊卒以衆寡不敵均遇害

竇興祥南鄉人同治八年賊攻寨偕侄大德等五人俱被擄不屈死之

馬據德南鄉人讀書深通大義督工築寨藉保鄉閭同治八年回至環寨而攻衆有潰志據德與鄰人李樹芝結盟死守樹芝殺女為誓防守五日寨陷樹芝自剖腹死據德與子思明小八兒侄思聰思恭等俱被害

趙希孟東鄉人同治九年賊圍寨堅守不出賊計窮以數騎挑戰遂設伏以待之希孟不察率衆往敵伏發被害

李樹汶西鄉人同治九年與胞叔同被賊擄憐叔無嗣謀先脫叔而已作質叔歸欲乘間逃賊知之遂被害趙生葉南鄉人同治九年賊攻寨衆潰寨陷遂被害趙生苓南鄉人同治九年賊圍寨晝夜不息人皆惶恐坐以待斃生苓犧牲性命遂與子文載率衆出戰伏發死之

王君山東鄉人同治九年賊攻寨甚急邀同族秉傑協力拒守誓不屈嗣因賊蜂集衆潰被執同時男女七人均遇害

謝練武西鄉人同治九年賊圍寨內外隔絕坐困數日  
練武挺身開門率衆迎敵衆潰力戰被害

魏官文東鄉人賊入境夜襲寨衆潰官文奮力拒敵力  
竭與魏鍾儉等均被害

李承緯東鄉人同治九年賊襲寨陷之承緯見衆潰散  
隻身奮戰力屈卒與承言承柱及高嶠兆等皆死之  
葉成仁六品軍功西鄉人同治九年寨陷戟指怒罵被  
賊斃割支解而死

崔種玉南鄉人幼習武藝年逾古稀猶強健不屈同治

九年賊夜襲寨已登堞種玉於女牆上擊賊被擲石  
殞命

詹永堂五壩人同治九年守寨禦賊衆皆惶怯永堂提  
槍梭巡期壯衆膽以示堅守適於牆上指揮方畧身  
中飛彈死之

李竹春柳林湖人同治九年寨陷執挺衝圍賊擒之倒  
懸梁上用火銃擊死

王立勳紅沙梁人同治九年堡陷兄弟七人力戰死之  
常 洛紅柳墩人同治九年賊圍寨守禦三日寨陷罵

賊被害

薛世忠監生六壩人同治九年被賊執索賄贖身裂皆怒罵不屈死之

高廷獻文生六壩人同治九年賊圍寨危如累卵廷獻率衆堵禦因核心子克讓克遜冒圍直犯卒不克父子俱戰死

竇作祥南鄉人同治九年回至寨陷作祥率衆力戰死於難

姜映桂南鄉人同治九年率衆防禦賊蜂擁夾攻戰守

多日力不支遂被害

陳永泰東鄉人同治九年守寨禦賊力戰多日衆潰

被害

趙錫道東鄉人同治九年回攻寨堵禦多日力竭被害

曾篤曾信東鄉人守寨堵禦常率衆出戰同治九年賊至力戰不勝同死於難

唐秀國監生東鄉人同治九年回攻寨甚急與貢生唐

仙遠均闔室自焚

丁繼陽武庠柳林湖人同治九年率鄉勇逐賊衆潰

被難

馮作霖監生柳林湖人同治九年賊犯境寨陷作霖力

戰死之

趙錫徽本城人性剛直有勇略同治九年充辦團練晝夜巡城頗著勤勞後拒賊於東渠秋字號奮力轉戰時久衆疲單騎直衝賊鋒伏發陣亡

劉克亭柳林湖人同治九年率鄉民督辦河工突遇賊衆驚潰克亭挺身荷鍤力戰死之

劉耀勛柳林湖人同治九年回寇境堡陷擄掠甚衆耀勛被執脅之使從卒不屈而死

丁過文柳林湖人同治九年賊攻寨率衆衝圍被刺

而死

丁世道柳林湖人同治十年賊攻寨危在頃刻度無生理與弟世胄舉家二十餘口俱吞毒自焚

李復元柳林湖人同治十年寨破罵賊賊碎其屍

張承魁東鄉人同治十年賊攻寨率衆出禦力不支寨陷殉難

田墾瑜東鄉人同治十年回至同田金基田盛基協力逐賊被刺而亡

張興嵐南鄉人同治十年與馬雅運馬祐運同被賊俘喝令服役不屈均遇害

李家麟東鄉人回變充團總奉調赴公中途遇賊殺傷甚衆及被執罵不絕口賊怒腰斬之

薛世禪東鄉人回變充鄉團禦賊死之

安福國北鄉人回變春耕無水率衆築堤誓死戰以全農功賊至奮力捍衛業已避道遠遁忽道旁伏發同王三陽等均遇害

張述前南鄉人寨破一家十餘口均被賊戕同時死者無算

唐國監生東鄉人寨破人死無數國亦被害

曾培池東鄉人寨陷死者枕藉培池殉難

劉中理東鄉人寨陷屠戮殆盡中理死之

張國義東鄉人寨陷居民百餘口國義與張廷重均

被害

姜尚忠東鄉人寨破闔家殉難寨內居民無一脫者惟

尚忠避匿更房內幸免焉

劉中科東鄉人寨破被賊舉火同時焚死者無數

劉朝山本城人性好武有膽氣回變充練勇遇賊於北

鄉力戰死之

石存天東鄉人回變偕弟存謙禦賊羊路口死之

馬理周東鄉人回變與衆避難北山賊至率衆禦之力不支同李春秀黃文備等均被害

孟吉元東鄉人回變與張廷琰等禦賊力戰不支

同遇害

林順成紅沙梁人性剛勇逆回夤夜襲寨緣梯擁上人皆惶駭順成率衆敵抗力竭不支遂死於難

李新基紅沙梁人性好善樂羣回變居寨守禦一日羣出擊賊其妻力沮不令往新基曰死亡自有命遂出交戰正酣戰時被彈擊腦而卒賊復取其頭顱懸之而去

謝雙桂庠生西鄉人率鄉團守寨賊環攻百計防禦寨陷遇害

李含芳庠生東鄉人設帳訓蒙精醫術回變禦賊死之  
李樹琛南鄉人同治間回亂充團勇五年隨張武軍出征夾河至張家大凹遇敵死之

高天篤本城人同治九年從團總魏光明救援大灘堡陣亡

何九來本城人由本營經制道光二十一年換防喀什二十三年張格爾反九來從征陣亡

謝宗道本城人充團勇同治四年防堵南河口賊至隨團總楊作梅直衝賊陣適因作梅被賊困核心宗道執矛刺賊救團總出力不支遂亡於陣

張彥德武生本城人充本營馬兵清咸豐八年隨甘肅提憲某征陝回陣亡

彭發科本城人充本營馬兵清咸豐八年同張彥德征陝回陣亡

盧中山閩百歲梁福祿嚴福壽王天德嚴百祿等均充本營兵丁清光緒二十一年閏五月從涼州總兵劉

璞出征海石灣青沙嶺等處逆回因衆寡不敵軍潰中山等皆亡於陣蒙恤入昭忠祠

盧錫璋本城人充團勇清同治九年九月從團紳謝大成救圍於柳林湖秋字號軍潰陣亡

李永慶本營經制清同治十二年帶兵勇護送生童赴涼應考及至香家灣被賊衝散永慶率兵堵戰殺賊

多數廼因寡不敵衆力竭陣亡同時被傷兵勇五十人劉宗科本營馬兵清咸豐間從慎公保討賊於西甯陣亡

李樹昌雲騎尉本營千總同治三年調赴甯夏救圍陣亡



張永華本營馬兵同治三年從千總蒲永元救圍於永昌陣亡

段敏儒本城人清同治四年充團長堵賊於南河口為人有膽略及敵陣揮戈亂刺殺傷甚衆因民夫潰走獨力不支遂亡於陣

張大志本營馬兵清咸豐八年從甘肅提憲某討回於陝省至臨陣奮不顧身揮戈亂刺及賊潰猶能獨力疾追跟踪截擊所獲器械並殺傷甚夥次日賊仍襲陣大志隻身前敵力不支遂亡於陣

謹案回變以來都人士橫死者多矣獨團練之揚旗擊鼓抱鐵血主義以犧牲性命尤為忠義之所萃云蓋自同治紀元花門構亂焚燬擄掠鎮邑之遭其蹂躪者已逾五六年矣而創鉅痛深咸鑒於孤立無援選丁壯繕甲兵聯聲勢以保衛桑梓四境之內凡市鎮村社亦無處不有鄉兵當醜虜猖獗之時負戟從戎或分屯數寨中礮則血肉橫飛或合援一堡櫻鋒則屍骸封積甚至拒守要隘賊以大隊來衝嚴陣堅持不移寸步不幸失敗須臾

之間死亡枕藉捐軀殞命者率常數百人此亦極人世之至慘矣然而前者仆踣後者繼起蹈白刃而不辭肝腦塗地而不悔者豈皆迫於時勢浩然輕生哉亦由土風勁剛出於天性加以死義諸君子為之倡忠誠所感氣機鼓動而不能自己耳噫大丈夫見危授命甯效命疆場以馬革裹屍終不屑老死牖下自埋其骸髒之骨緬懷先民英烈之氣勃勃如生雖謂至今存可也

勇略

馮榮光字恩軒性好武器宇魁偉胸有韜畧清光緒二年投入嵩武軍張曜大營從征西域每與敵戰即挺槍躍馬破其中堅以獲奇勝大府奇其才奏保以游擊儘先補用札催再三輒以軍事倥傯辭不就洎邊疆肅清凱旋河南麾下士卒大半遣散獨榮光奏留管帶河防順軌安瀾勤勞卓著庚子變起委署荊紫關副將實授永城營叅將其地盜賊紛起素號難治榮光蒞任先布恩德以示招撫寇稍戢其後漸形嘗試刦掠時聞榮光即口啣短刀手提長矛先向著名

大盜單騎入剽草薶禽獮盡絕其根株一時道路甯靖威振一方人皆呼為馮四老虎後因公罣誤罷官歸里鄉人以榮光緒練河工咸請督修綢繆擘畫巨細躬親惜功虧一篲身發疽攻之不克遂操刀即割侍者驚榮光曰吾殲渠魁亦如是瘡夫何懼遂割之不數日而卒

謹案豪傑有志之士惟賦性剛直是以遇事敢為凡利害生死俱不足以介於懷以移其守榮光一武夫耳觀其不趨利不避害不計死生剛毅果敢

以視巽悞庸莫之一遇艱鉅即計較於毫髮系粟而氣先餒者其相去何啻霄壤噫榮光亦人傑矣哉

孝友

孫助策字奉書廩生篤於內行赴陝鄉試比臨場母歿訃至或勸隱訃入闈助策大慟曰如此則大本已虧功名何取乎不試而返

魏聯魁生員父早亡事母至孝同治回亂負母逃難於黃沙窩賊至脅之降聯魁罵不絕口賊怒以刀砍項昏仆於地次日門下士偵知往探其母在旁涕泣扶

之頃已半折幸氣管未絕昇至家調理痊可奉母愈  
謹母卒哭泣盡哀

魏勵國侑禮生繼函子同治五年繼函避賊於石板井  
賊至強脅之去不從遂遇害勵國猖狂號泣思報父  
仇嗣因守寨賊至即率敢死士數人揮刀力戰手刃  
十餘賊勵國曰此雖稍慰父靈然未得戕父之賊終  
以為恨焉里人皆贊其孝年三十餘而終

閔文芳少失怙兄弟俱幼家窶甚經營生計辛苦備嘗  
性友恭尤孝敬孀母同治八年四月逆回攻寨陷又

將掘其父墓文芳挺身勇往奔護父墓與賊相鬪數  
次既而羣賊擁至遂遇害人稱為孝烈雙全

張從仁字元甫清同治癸酉優貢光緒乙亥舉人事繼  
母數十年始終承順無間言待兄弟友愛篤摯尤善  
賑貧濟苦後官中衛教諭勤於訓迪孜孜不倦子錫  
壽舉人官新疆興平縣知事

盧興枝字立堂幼嗜學艱於事畜遂輟讀以農起家性  
孝友父峩峰晚年惡囂構廬西山藉以適性興枝頻  
頻往省不逾旬曰凡家中甘旨必馳送百里外不先

父食後省父甫歸里夜半忽褰衣遽起告家人曰吾心怔忡不寧得母父有不懌乎遂早旦驅車奔馳越宿至父舍父果呻吟不起遂急擁扶輿歸抵家三日而歿兄攀枝歿遺子襁褓幾難存活興枝母其嫂子其侄撫養三十餘年如一日弟旺枝中年無嗣旋被回難興枝痛曰骨肉至此吾生有兩子寧忍弟死無嗣乎乃以次子承其祧至鄉里有不平解決後兩造服其義遇有重金來餽者興枝正言拒之遂不受若因關人名節諸事釀起瑕釁必借他端以息之絕不

言其真相人皆謂興枝有陰德焉卒年七十有三子逢慶郡增生見學行

吳廣文事母至孝母死哀毀骨立三年之內未脫衰服夫婦不同床都人士均稱為孝子

劉紹謙字益庵監生廩貢培英長子副榜紹遠異母兄也誠篤謹慎恪守孝道奉繼母曲承歡顏鄉里以古薛苞稱之邑貢生趙志濂有傳子來善庠生孫毓麟毓棟庠生

黃文蔚字曉峰壽年子幼喪母哀毀如成人事繼母尤

逾所生有陝商吳某以債收毛姓舖業計直三千金因與交善願以價之半讓其業文蔚曰歸我則肥一家歸公則贍多士急愆憊之卒歸文社為鄉會兩試川資及諸生膏火之費乙丑回亂城垣半圯文蔚捐貲三千金為之倡并防守城垣歷十餘年未嘗少懈嗣因回靖由監生以練團助戰贍軍衛民功保獎從九品不論雙單月選用並賞加六品銜後以疾終伏羌王權銘其墓

楊天澤生員性最孝奉繼母委曲承順始終無間年三

十妻歿矢不再娶雖子孫成立天澤必親奉湯藥不少懈年七十二卒

謹案古今遙遙宇宙茫茫人類所以常存不能漸滅者惟倫理有以維持之若綱常骨肉間無道德心以厚其根抵則大本已虧風俗之敝將於是乎不可救吾觀鄉先生之內外完樸處常則盡禮遇變則致身砥節礪行非藉家庭為立名之地亦情真意摯常抱聖賢盡性之學以期見諸實行凡視目前利害俱屑屑無足動其念者今雖先民既歿

而德音是存者其言可考使轉相仿倣由一人推  
之一家由一家推之鄉鄰族黨則教化之行固自  
易易其所關豈淺鮮哉

### 事功

謝集成字振之嘉慶戊午舉順天鄉試幼聰慧尤酷嗜  
學為文本於經史父子濟美自名一家當時科甲鼎  
盛惟謝氏稱最主講蘇山與諸生說經論文勲勲懇  
懇若父兄之誨子弟文風於是丕變時學宮傾圮倡  
捐修葺親督工作規制重新又偕同人捐立文社助

鄉會試川資復以贏餘主修邑志事賅文簡鎮於是  
始有專志洎官鄜州州同調商州知州皆有政聲攝  
磚磑廳篆歷八年尤盡心撫字民戴之如依慈母嗣  
升漢陰通守未履任即卒士民揮涕樹德政碑武威  
翰林張澍有傳大學士牛鑑與陝西翰林路德均有  
留影詩

張奮翼字翥南性篤摯博涉載籍嗜古不倦登道光已  
酉賢書旋聯捷分發四川歷任清溪鄰水等縣事勞  
心撫字政簡刑清不苟取不媚上澹泊終身若書生

然民以廉吏勒石誌之子熙穀仍官蜀南江知縣後升合州知州卒於官

張爾周字筱莊道光庚戌進士官四川知縣署夾江長壽等縣補仁壽實缺以憂歸服闋改官陝西歷署西鄉紫陽甘泉補蒲城蜀俗凡官下車胥役有夫馬費代書有戳記費爾周皆擯却之夾江有棉肆上官遣官徵釐稅爾周婉請薄征後竟白罷之去任時商人釀金為贖卻之不可乃留置書院以資寒畯涪州鶴遊坪之亂長壽與之接壤爾周率民團赴州界擊賊

擒匪首周章義等三十二人事平籍叛產若干畝計直三千餘金盡歸之書院仁壽訟繁吏猾宿弊聚積爾周立簡明堂規區別新舊緩急分日受狀又為籌命盜巨案相驗招審諸費緣舊日皆取諸地鄰及盜所扳引指稱窩主寄贓之家爾周籌的款備用而地鄰及被扳者皆免科派上官以其法旋立案行之藍大順之亂圍井研踞資州遂入仁壽境爾周練團防剿令民擇險築砦移老弱資糧居其中賊無所掠食卒不得深入後論井研解圍功保薦以同知候升西



鄉紫陽皆陝西南山巖邑僉匪不時為患爾周申嚴保甲聞盜即會營往擒鄉閭賴以安堵嚴禁糧差不許截墊地丁民得免賠償之苦甘泉瘠土久旱爾周請司庫銀千兩開渠溉田使飢民傭力自活及蒞蒲城則賑已竣而餓莩猶纍纍相望爾周以憂勞卒於任馬劬義字盡臣舉人起鳳子幼聰慧豁達好施而奮志於學由廩貢官隆德教諭任滿回籍適值回變倡捐萬金助餉築城並設局防守勤勞卓著地方賴之尤熱心學校鼎力栽培口碑嘖嘖至今猶載道焉

馬服侯字樹屏稽學嗜古砥礪名行屢試未售旋入太學關心時事且好義輕財不計錙銖咸豐中葉甘省餉絀聞詔捐助萬金以助軍餉上嘉獎以道員議叙官山西雁平冀甯道蒞任有惠聲都人士咸艷稱之子積馨官陝西安康縣知縣卒於任

馬明義字鏡臺同治壬戌進士分發湖北署枝江縣時旱蝗交集哀鴻遍野明義加意撫綏民賴以安暇時接見士民藉訪閭閻疾苦於胥役則嚴加約束不肯稍假有鐵面冰心之頌去任時父老攀轅而留者數

百人

藍佩青字海峯夙慧不羣有學行同治紀元由增貢生  
舉孝廉方正會值回亂督辦本邑團防捍衛桑梓不  
遺餘力事平以保安勞績遞蒙優獎十三年召試補  
行制科朝考以試用知縣分發湖北署歸州知州歷  
署隨州知州歷有德政卒於官

聶炳南字午亭咸豐辛酉拔貢性質直少有才名設帳  
里塾循循善誘多所成就同治四年逆回壓境炳南  
同藍佩青馬劬義等督辦城防籌捐募勇固守堵禦

續修鎮番縣志

卷九

人物列傳上

三十三

勤勞卓著事平保獎以知縣候銓後主講蘇山書院  
情殷訓課士林翕服年七十餘未仕卒於里

謝宗誠字明齋從九銜為人有膽氣敢作為不阿附世  
俗同治回變起協同藍佩青馬劬義等襄辦城防策  
略宏富應變有方九年九月賊襲西北城乘夜登陴  
宗誠宅附近城垣夜半聞警刻即奔赴城上大聲喊  
殺勇丁鼓噪前進遂逐退羣匪城獲無恙事平保獎  
以巡檢候銓年六十餘卒於里

梁廷榮字錫侯庠生舉人來鵬父性耿介取與不苟交

接多知名士管理學欵無少含混且能剔清諸弊振興學務同治四年回壓境繕修城垣諮商堵禦在在勤勞不遺餘力事平以修城功最保獎以翰林院待詔銜年七十餘而卒

謝大成字集三監生能文好武多才有膽略清同治回變帶領本城馬步練勇保圍城垣多著勞績及討賊於柳林湖唐家灣大灘堡六壩湖等處疊獲勝仗均屬奮勉後因克復裴家營堡功保獎典史選用並賞戴花翎五品銜時遇地方爭端紛起無不極力排解

鄉里咸欽敬之

盧逢辰字樞天咸豐壬子武舉性和平有勇略清同治間回犯境逢辰分帶防勇救圍於唐家灣柳林湖等處殺賊多數累著勞績旋因克復裴家營功保以儘先守備未仕卒於里

謝迎桂字馥堂優廩生規行矩步博學能文設帳家塾誨人不倦清同治五年以督修城工功保以典史職並賞加六品銜未仕卒於家

張毓瑞鄉飲耆賓新疆知事得善父賦性渾厚人無間

言濟孤恤貧不少吝惜同治四年回亂修城垣助兵  
餉毓瑞多有勳勞教子得善讀書訓課之嚴不少寬  
假得善英年選拔毓瑞愈加策勵並不以晚年得子  
偶涉姑息年七十餘而卒

張承晏字海臣由房吏候選典史新疆知事建勳父性  
渾厚沈默寡言凡族黨有貧乏者無不竭力周旋課  
子讀書督責甚嚴建勳由優貢中式副榜人皆謂承  
晏有厚德焉年六十餘卒於家

謹案士固有樸誠篤實合窮達顯晦無所往而不

奮勉者非必好高騖外思建非常可喜之功翹然  
獨異於衆盡其心焉而已吾鄉諸先達正誼明道  
既抱經生本色出而與朝野周旋雖為循吏為仁  
人設施不必盡同然勳勞著於國家義聲聞於鄉  
里要皆隨地程功各有所表見於當時噫斯亦可  
謂無負所學無忝所生者矣

學行

李鳳儀字象韶嘉慶丁卯經元博學工詩文尤敦義氣  
談經講藝所交皆知名士屢上公車卒不售即以所

學教授鄉里一時俊髦蔚起多被裁成嗣因學宮傾圮書院廢弛鄉先生設法維持繼續振興鳳儀與有力焉子大來庠生泰來廩生

馬起鳳字棲梧嘉慶丁卯舉人勤學好義凡遇整理孔廟振興學校諸大端慨以巨資倡毫無吝容平居敬老恤貧崇儒重道樸茂之行一時學士尤莫能及者道光五年續修縣志蒐輯採訪不遺餘力後官陝西岐山教諭振拔寒畯無異桑梓岐山文教大興僉以馬公為導綫云

路彩雲字香衢嘉慶戊辰舉人博涉經史為文力追先正不蹈恆蹊前修邑志採訪校讐詳明可徵及講學蘇山循循善誘士無遠近負笈從遊者常數百人一時俊秀書升皆其門下士後官西安府教授子培芝舉人大挑一等未仕卒

曹秀彥字書升博學強記貫通經史為文奇麗不羣古人雜體俱臻精妙由嘉慶丁卯副貢中道光乙酉舉人官陝西膚施教諭其地有士充里長之俗長官每比較間以平民待士動加箠楚秀彥申文力除積弊

一時學風丕變士儒咸知自重秩滿歸養事親以孝聞咸豐辛亥舉孝廉方正三設里塾重講書院尤以敦品勵行為先務數十年桃李成蔭門下如進士傅培峰死宜黃難此其表表者其餘科甲蟬聯媿美盧氏植桂居焉嗣纂修邑乘體例精嚴不愧史才至監修學宮勸立文社凡學校公益皆毅然自任不敢告勞邑侯周古漁李杏南嘗贈聯語以表其品學年八十卒於里

馬肇運嘉慶辛酉拔貢性醇厚好學不倦文藝楷書俱

極精妙節次主講滿營松華與邑書院多方善誘士多騰達晚年娛情桑麻非公不入遇先正格言即手錄以示後人飭德砥行老而彌篤實有其父舉人世玠風

謝紹源字清來廩生品端學富言笑不苟教人先行後文設帳梓里塾中生徒幾於舍不能容沐其教澤類能破壁飛去時若藍毓青盧寶倫諸孝廉皆出門下其明經採芹者不可勝記尤工書法筆鋒遒勁學書者一經指示不問而知為清來之徒也邑侯周古漁

以樹鵠儒林贈之

康以直字雲嶠廣西容縣知縣舉人繩武子幼穎異博學工文為邑名諸生道光癸酉以拔貢舉於鄉年少溫雅善承庭訓崇實黜華敦尚行誼凡關學校事宜無不力贊其成前修邑志縷晰條分尤見結撰後由大挑分官福建甯化知縣

李中學字靜初道光辛巳府學鄉貢性恬淡不求仕進經術湛深文藝超絕設帳數十年教授生徒無不各因其長以表見於時風世勵俗惟以師道自任正樹

高標人皆仰之

聶盛年字際唐原籍鎮番寄籍安西州中道光丙午舉人禮闈屢薦不售銓授靜甯州學正訓誨有方一時賢士皆從其游同治五年委護玉門縣訓導十二年推升甯夏府教授蒞任三年士林欽之

吳兆斐字萊崖由拔貢中光緒丙子舉人性嗜學持身嚴介不阿時好見人有善即獎勸不已若稍有錯誤譴訶亦隨及之主講蘇山除文藝帖括口授指畫外其餘敦品勵行率以身教以故門牆雖峻邑士樂受

其裁成後官金縣訓導旋里卒

趙延齡字俊臣光緒壬午由恩貢舉於鄉讀書有沈毅工學以躬行實踐為歸至里塾教授勤誨弗倦門下成就甚多先於光緒戊子南墾建修文昌宮延齡極力經營卒告成功尤精於醫凡貧富有求無不情殷診治其謝禮酬敬概卻弗受後主講蘇山討論精詳學者奉為模範

盧逢慶字餘亭號燕峰為郡增生天姿聰穎有異才受業李天豐路育英盧毓萊諸先生之門機警敏達咸

曰為英器嗣值回變士儒輟業問津無門遂攻書於寨內墩房磨墨守夜揮筆代柝凡遇古訓銘詞即手錄成行黏貼座右箴言滿壁晤牆如對嚴師及入郡庠簡鍊揣摩力求進步奈棘闈久困家貧親老遂設館里門舌耕四十年授徒數百人一鄉之食餼登科者多出門下為人清癯雅正面有風稜課子詩禮庭訓尤嚴稍不及程則笞責立至當隆冬夜闌燈火熒熒相對伴讀不少懈家世清窶子弟游學及遇歲科鄉會諸試力不給雖典衣質產不惜也子殿魁由舉



人官新疆歷任迪化巴楚疏附縣知事誥贈奉直大夫殿元舉人由四川直隸州州同改選新疆縣知事殿卿監生殿樞增生

薛世表字旌川庠生光緒間舉鄉飲介賓性和易篤於天倫宗族里黨遇有零丁孤苦萬難存活者必教養撫卹俾各有所成立而後已且好施予里有張某母歿不能具喪葬世表即以妻之嫁奩假貸不計值生平喜延名士不攀援勢位同治回變翼帥張公曜統兵至鎮每重其為人欲從征西域共參謀議世表力

辭不去故設館授徒因以琴書終其身子生睿監生  
生濟廩生

曾貫元字少輿廩貢生局度嚴整淡於利祿少有英譽而奇於數累薦不售因以教授自娛尤精歧黃善用景岳秘訣決人休咎如桴應鼓時或有餽遺者輒嗤鄙之子毓庠監生希垚廩生憲章增生

姜子材性循謹樂易與人無忤終身未嘗履公庭尤善引掖後學嚴庭訓以盡其文訣故其子學正弱冠遊泮旋食廩餼猶戒飭若童蒙時聞里教子弟者咸取

則焉年七十餘以壽終

謹案士君子振拔奮勵蓄道德能文章度其身其時其地有可以裨國家利民人者則出可也不然則名山講道斗室著書本所學以教育英才矜式鄉里亦足以娛樂於當時况手栽桃李熏其德而善良望重粉榆造其廬而愧悔經明行修内外完樸其有功於世道人心者正復不少孰得以里巷迂生抱學究一經而譏之詩曰雖無老成人尚有典型又曰高山仰止景行行止即吾鄉縉紳先生

之謂歟

文苑

謝集梧字東園嘉慶丁卯舉人性方正學有根柢道光乙酉與兄集成纂修邑志網羅故實參以見聞事竣付梓數百年來繼孟吳盧諸家遺志文獻賴以足徵者實以謝氏兄弟為後勁嗣又倡募巨金修葺聖廟栽培學宮繼往開來尤為時輩所推崇官陝西渭南縣教諭刊立學規秩序嚴整當時士子景仰咸稱為正學碩德人倫師表

盧寶倫字叙堂道光二十九年舉於鄉性和藹樸誠介直不喜積聚獨慕古人設帳談經栽培後進之行主講蘇山數年校士課藝本先世家學以風勵儒林一時聲望品誼光氣振人無論識與不識讀其文即知為叙堂先生之作觀其生徒即知出於叙堂先生之門文字流傳不愧為盧氏一派平時遺書滿架凡六朝帖括唐宋詩文以及名人著作時賢傳記羅列蒐集如數家珍所居書屋建有先祖教澤石碑號曰碑屋家藏祖遺翰墨並窗稿甚夥惟祖遺四書回講尤

為世所罕觀琴書逍遙樂易終身子蔭棠附貢生獎叙府經歷

李向清學名存第歲貢生清操甘貧學深養邃且不阿附世好應鄉試未售遂無意進取教授生徒講明正學迄老無倦士林盛稱之子中選歲貢生質直好義有父風

白朝佐字翼堂歲貢生幼穎悟家貧嗜學為文雄奇下筆千言立就迺數不偶屢困於鄉闈設教家塾誨人不倦遊其門者幾於舍不能容年七十餘卒鄉里推

為名宿

盧毓萊字蓬洲少有才華家貧嗜學就傅年餘已能文入泮後家無斗筲即藉硯田墨雨為人傭書以佐讀既食餼稍足自給但功名念切藏書無多每於經史子集按時借讀輒成誦不忘人皆以翰苑目之尤工駢體詩文雜作直逼唐宋四六之上光緒丙子登賢書因春闈屢躋遂終身講學設館授徒聲名噪甚一時都人士所有騰霄昂壑文學卓著者皆稱為蓬洲學派云子雲生庠生

謹案自古文人學士讀書明理必博聞殫見具有大著作家大學問家大教育家之藝文器識而後可以為通儒若謝盧諸先生擢科登第雖未置身廊廟著勲名於當時然蓄道德能文章抱經生本色出其英竒犖落淹雅宏通之量以擴充家學造就人才蜚聲馳譽數十年來後生小儒學術文風尚能追踪先哲歸於正大不至個規錯矩遺名教詩書之隱憂為世詬病者未始非數君子有以立其防而樹之鵠也噫典型猶在吾且步趨從之已

義行

劉紹遠字致庵咸豐壬子副榜性慷慨好施濟同治回亂捐修軍械辦理團防七年邑大饑紹遠毀家賑貧所儲既罄又往甘泉南山馱運米糧數百石併力接濟全活甚衆

馬理澍字潤田侑生在涼經商適於中途拾錢券貳千緡即坐路隅守候未幾失主覓至理澍詢其數符不問姓名悉還之同治回亂出貲修寨繕治軍械率鄉人防守雖溽暑隆冬不敢少惰以故保全甚衆里黨

咸感佩之

蕭光盛性豁達爽朗意氣自豪遇貧苦親鄰輒傾囊飲助不計值至購置田產既得雙方同意証券成立後若第三者復欲占有即解除條件消滅其優先權以相推讓里黨引重咸謂其有盛德云

張興技同治回亂衆苦無守禦地興技出貲築寨與避難後以協濟兵糧民困雜征興技多方彌補寨內公款不給並貧民無力出貲者興技皆任之

馬翕義字萼樓家中資性好施與求者輒應無吝容鄉

里有婚葬無力者皆助之同治五年回亂翁義捐白金一萬四千兩在縣六壩頭道溝舍其田四十餘畝築堡寨遠近老幼絡繹來就者如歸製軍器募南山獵戶晝夜防守是年饑翁義又糴米數百石以濟飢者八年又散給籽種十二年賊復至適廣東提督張曜客軍從靈武過境翁義扣馬請留遂駐堡中賊聞之遠遁境內肅然生平與世無競處兄弟怡怡篤愛至老不少渝宗族戚黨皆稱為善人云

馬服琚字子佩從九銜性孝友慷慨豁達深明大義同

治初逆回告警河西州郡無不糜爛丙寅歲賊圍縣城危在旦夕服琚顧全大局竭力圖存急捐鉅款同縣令哈公國霖往來關說賊遂飽颺嗣因修城設防徭役雜興服琚捍患禦災毀家抒難卒無吝容生平尤嗜學崇禮儒士亂平後即延師設館親族子弟登賢書為明經者多被栽培人皆以盛德稱之子四長駿烈附貢生仲積汶經商叔積鑫季積垚俱入邑庠陳克孝字伯翹增生幼失怙事母至孝同治五年回亂克孝出貲在下二東創築大寨急製軍器料理甫就

賊猝至川湖避難者不下萬餘皆得保全鄉人德之  
謝日章字闇然性孝友好施濟每逢鄉會試艱於貲斧  
者無不傾囊相助孫翰南甲午舉人都人士咸謂樂  
善之報

謝毓麟字祥周從九銜性孝友喜任俠遇事敢為同治  
回亂親率丁壯防守時有採買協濟諸項毓麟親赴  
酒泉詣左宗棠投狀諸弊胥除至督辦河工勤勞卓  
著至今猶嘖嘖人口

黃壽年字仁庵年八歲失怙繼母喬氏撫育成立事親

至孝處兄弟備極友愛生平居心以自欺欺人為大  
戒先是貸某商金三千積久往還債主失其証券忙  
不記憶壽年為之話其始末卒還其金同治間邑遭  
饑饉壽年倡義請官平糶又出已粟賑之全活甚衆  
及逆回攻城勢已岌岌民大恐壽年激厲同志晝夜  
堅守命家人執釁以餉守者城賴以保存

魏贊國侑生同治五年聚衆堵賊環圍數重勢將全覆  
贊國遂向賊甘言許以重賄讓衆逃生以一身為質  
及衆遠颺賊索賄一無所與賊怒以亂棍擊斃時年

六十餘里人皆感其義

徐世俊農民同治間防守堡寨子藥不給遂冒刃潛出  
購買百里外星夜往返履險任勞闔寨人民遂得生  
存年五十九而終

辛得慶監生性和厚循循有規矩家庭內外人無間言  
族黨有貧乏者皆代為籌畫隨時補助不少吝惜亦  
不令知名於鄉里一時美德所及尤為鄉里所感戴  
年六十九而終

邱爭榮庠生同治十年逆回猖獗寨陷與汪積翰出重

圍冒鋒刃奔往賀蘭山乞援於嵩武軍遂削平大亂  
邑人德之

邱建瀛監貢武舉逢吉父有才辨敢作為辦理三渠河  
工疏濬得宜官民皆信服之年五十二而終

劉節禮生員幼嗜讀兼好武藝同治間逆回擾境縣諭  
辦理團練節禮領鄉勇堵賊於抹山馬湖灘因賊勢  
蜂集寡不敵衆團勇烏合之衆被賊衝散節禮整隊  
殿後保全一旅人皆壯之

包登俊同治九年賊攻破李家寨人皆倉皇失措敗不



相救有鄰人田達基越墻奔竄跌捐兩足危急間匍匐不能行適逢登俊肩負而逃俱免於難里人皆贊其義

袁型仁耆賓性謹慎好施濟同治九年回匪擾境蹂躪五溝連破四寨帷型仁屯庄獨存避難人民蜂集蟻附衣食無資型仁傾囊以助全活無算年五十八而終人皆德之

許兆元監生性慷慨尤敬禮儒士每逢大比無力北上者無不傾囊以助之邑進士傅培峰未第時赴試春官艱於貲兆元厚贖勸行是科即捷步南宮時人咸

稱其義後因齒德俱優舉為介賓年七十餘而終

劉廷棟武生性剛直有膽氣遇事有不平者輒力爭而身任之平日以禮法自閑雖當道莫能瑕疵焉地方利弊所在必實力興除而後已遇童試之不合例者執律面爭不少徇隱公正遺風至今猶嘖嘖人口

李秉乾監生性敦厚見義勇為常設立家塾延師課藝族鄰子弟貧不能讀者秉乾悉出資餉學勉成其才

平時排難解紛寧人息事尤為閭里所欽重孫高科郡庠生

張向圖耆民宅心忠厚敬重師儒梓里設塾延師課讀  
雖向圖子弟無一及門者而歲出修金以優待先生  
未嘗缺禮同里有緩急多所周旋孫建麟武生曾孫  
連中庠生

胡世道以農起家質穎悟正直不阿好施濟兼重文士  
同治間回族擾亂世道捐貲築寨保衛一方鄉人感  
激遂以匾額誌其德遠近逃難人民至寨無不推食  
解衣竭力成全寨上修書舍延師課一方子弟子婿  
張存勗貧幾廢學世道曲為栽培旋中副榜年七十

餘卒子二孫五率多監庠曾孫滿堂人謂盛德之報  
劉人傑字漢三增貢生性和藹好義遇冠婚喪祭創修  
寺院罔弗量力樂輸共成善舉人有陰私必微曲彌  
縫不令表暴常以敦品修行為唯一宗旨同治回變  
倡修團庄竭力捍衛卒能保障一方免遭慘戮時值  
歲饑又設法買糧以救鄉鄰老弱俱免於溝壑皆其  
力也年七十一以壽終子建漢歲貢生

魏劬國生員性機警善變多謀畧頗曉兵法同治時承  
平日久人皆忘危逆回猝至戰守無資劬國聯絡四

溝急築堡寨以自衛及賊大舉來寇村庄鄉鎮多被  
攻陷惟劬國堡寨無陷保全甚衆人皆謂有義士之風  
田墾郎字新齋吏員精明渾厚言規行矩平時周貧濟  
急好善不倦及從公服務黽勉勤慎取與不苟尤為  
六科所首推年七十二以壽終子文基庠生

魏大徐性俠烈勇悍善鬪逆回之亂大徐率衆堵禦屢  
挫賊鋒賊雖啣恨而愛其才後被賊擒獲勸之降不  
從脅之以兵又不屈寨內急出重金贖之及歸向衆  
感泣曰公等活我正吾効力之時敢畏死以避賊乎

乃約敢死者數人協力防守寨卒不陷人得以安年  
五十一終

王廷佐字星五增生性穎悟剛正不阿同治五年回匪  
紛起廷佐團練民勇修築堡寨以保護桑梓七年饑  
饉廷佐解囊賑救散給炒麵飢民賴之後因鄉村糜  
爛民不聊生又與嵩武軍總領陳某率衆防堵親冒  
矢石受瘡甚鉅遂致莫起里人惜之年五十一終

張承册庠生沈勇多智好義急公同治回變人民顛沛  
無枝可棲承册急築堡寨修軍械備子彈所費工貲

絲毫不取於人及賊來益衆無所搶掠遂蜂擁攻寨將視子女玉帛為竭澤而漁之計被圍數日人人自危承冊設計詭言曰前聞嵩武軍出城旦夕將至吾輩宜靜守若聞官軍聲息即可開門擊賊以殄醜虜又何懼至夜半率壯士數人持鎗執號縋牆而出距寨里許即以草繩燃火分布荆棘上遂吹號鳴鎗齊聲喊殺寨內望見人皆歡呼雷動賊遂驚走後值年饑道殣相望又計村中老幼散給粟米全活甚衆人咸以智仁勇稱之年四十而終

黃應堂字玉如廩貢生豪俠好義乙未河湟不靖甘涼戒嚴邑紳咸議築城以備不虞時南城郭門上有文星閣勢甚高峻議者恐寇階以登為城贅疣皆欲拆毀將舉事應堂力阻謂閣即城之保障可以居高明遠眺望登陴堵禦與城互應今毀之非惟自撤藩籬抑且失其形勝若有不測願以身家為質事遂寢城卒無恙

景濃山字柏長耆賓性慷慨勇敢好義同治回亂蹂躪地方勢若蜂屯遊擊韓率兵赴援適賊鋒甚銳願得

鄉勇以壯聲威濃山首充民團奮勇爭先賊遂遠颺  
鄉人咸服其義卒年六十四歲

謹案天下惟真男子乃有真性情有真性情乃有  
真氣概當世道險薄人心不古交際之間平居酒  
食徵逐誓不相負一遇小有困難雖有益於人無  
損於己尚不一引手救况利害關係連帶轉移而  
謂攘臂爭先視為天職天下未嘗有也若豁達之  
士抱民吾胞物吾與救人難濟人急之熱忱出而  
與斯世周旋苟有困苦顛連之現象當其前無論

金錢財產俱可揮霍視為不甚愛惜之物即值生  
死患難亦且犧牲性命赴湯蹈火而不顧豪情爽  
朗表表人寰一鄉有是人可為社會端風化一邑  
有是人可為政治增文明風世勵俗此事豈異人  
任哉

隱逸

無

技術

謝樹森原名播遠字建唐才學冠時制藝絕倫少年選  
拔學憲金器重調京肄業數年聲振隴右道光丙午

膺鄉薦屢躋禮闈後設館梓里循循善誘實繁有徒  
每逢童子試俗稱謝半榜生平尤工書法端秀鋒利  
直得醴泉銘神體士類推崇幾若一字一珠然究無  
多珍藏者

彭得信字仲庾恩貢生性沈靜簡默敦尚樸實課授生  
徒多所成就尤工書法專摹顏柳古帖筆力端莊士  
林爭相矜式焉

張從誠字樸卿附貢生知縣爾周子岷州學正金壽父  
局度端方和易淡蕩重廉隅不苟取與尤篤倫常生

平無嗜好惟精研書法終其身不少懈專摹顏魯公  
真草無不備得神髓書名噪甚士林咸欽重之年六  
十餘以同知候選卒於家

田達基字尊三精岐黃術尤深於小兒科痘症門中稱  
絕技焉利濟為懷遇貧寒毫不取值里人重之

李逢時生員天資敏捷通經史十九歲為邑諸生性耽  
佛教不苟言笑識者皆謂其有仙骨後赴甘肅屢薦  
不售遂棄家修行於華山年餘不歸家人訪得其耗  
母令其弟往尋之詢所遇僧皆云耳其名只在此山

但孤雲野鶴棲無定所居月餘山中僧皆奉給維殷似曾相識者然終未見逢時弟遂歸後數年其妻獨居有募化道士向乞鞋襪妻以無夫為辭遂返身逕去瞥似逢時其妻急出戶觀之然已無迹矣時人相傳以為逢時探家云

謹案豪傑之士抱英奇磊犖之概方且拔劍斫地以天生我材必有用嚶嚶然自雄於世若僅挾卑無高論之微長薄技爭相誇耀非惟自待太薄抑且位置當居何等矣雖然周公不驕人稱有藝尼

父少賤自號多能曲雜之術聖哲不諱况醫道通乎性命書法具有精神藥籠儲參苓梁公可為醫國手家廟留翰墨真卿不愧名世才惟大德既不踰閑雖小道必有可觀而謂方脈帖括無關重輕遂使聰穎學子自棄其難能可貴之能力甘與碌碌無所短長者同一伎倆豈不謬哉

耆壽

王三智字信菴性純篤嗜詩書神氣充固齒堅身健終日端坐無倦容卒年百有一歲

謝天位字共之武生景鰲父舉人翰南五世祖乾隆初  
劄辦屯務奉公謹慎年登九十四歲夫婦齊眉起居  
強健耳目聰明曾玄滿堂言坊行表鄉黨無不稱頌  
焉三渠以福壽康甯匾額贈之

潘永福年九十四身體強健耳聰目明不持鳩杖歿年  
猶氣度軒昂長子七十餘每對人言猶稱小兒人謂  
熙朝人瑞世傳壽種

馬多能字又亭賦性純樸耕讀自娛每值儒士必禮貌  
以待年登九十三身其康強子孫逢吉

王化新字光天孝友性成耕讀傳家年登九十一猶神  
清氣爽里人咸稱仰之

王文治年九十三精神矍鑠耳聰目明子錐綸現年七  
十五四肢強健人謂壽星聚於一門

王紹遠字緒亭耆民生員問周祖崇禮文士性行忠厚  
現年九十猶視聽爽朗步履健強

劉廬舉字愛卿耆民年九十性慷慨神氣清爽常與後  
生談論終日不倦里有緩急多資助焉

李興高字兆詩農民年九十賦性嚴正不阿時好登塗



步行入室端坐時人以老當益壯稱之

劉沛字雨人優增生鴻士子耕讀傳家諳練水利教人通曉經史並悉方境古事卒年九十一身健目明能書小楷

羅凝青字九成監生年八十六誦讀終身頗通義理每日摹臨古帖尤善書法耳聰目明起居強健人皆以梁灝目之

詹良德字善堂禮生幼嗜讀精研書法課讀一生淡泊自廿年八十五康強明聰燈下猶書小楷學館在十

里外步行往來未嘗曳杖終日與人言常端坐無

倦容

王興業性忠厚正直長於辦公鄉黨疑難常排解不遺

餘力卒年八十七歲

詹永仁字元卿年八十四起居強健忠信慈祥頗曉書

理通達世故長子桂年耆賓次子琮仲孫蔭棠

均監生

王鈞字樂天從九銜性慷慨同治間囿犯境出貲築

寨製兵器賊至被圍九日卒未陷保全一堡性命平

日遇戚黨乞貸皆如願以償無吝色亦無德容有數

人負債至千餘緡俱貧不能償遂執券焚之戒子孫

勿洩其事年八十四歿之前預示家人以時日至期果無疾而終縣令錢廣恩輓以至誠前知里黨榮之子開泰生員孫國麒乙酉拔貢甲午舉人

張廷讓賦性樸訥操作農功備極勤勞現年八十三猶服田力穡康強無恙

張承志字一齋世居所下溝謹慎敦厚篤於倫常尤敬禮儒士雖家道極寒日夕或不舉爨而子孫之讀書者縱不少輟以故子明經而孫賢書其繞膝趨庭者共數十人享壽八十有二五世同堂

段光福字海亭年八十三皓首龐眉勤儉謹慎不預公事教子課孫盡力於農人稱為守分君子焉

湯範典有勇略性果敢同治回亂攻圍海宴溝寨範典以身當先賊不敢近民人有被擄掠者輒奮力奪回鄉里皆稱其勇現年八十二身尚強健

張建魁字鰲峰庠生樸誠謹慎矩步規行清光緒間舉鄉飲大賓卒年八十五猶步履強健終日端坐無倦容尤善誘後學鄉里子弟多賴之

張承誥字靖康生員性正直言笑不苟嚴好惡慎取與

教授生徒首以敦品勵行為急務年八十一而終  
馬坤德字厚甫從九銜剛正清介不苟隨時治家嚴而  
有法閨門之內肅若朝廷年逾古稀精神矍鑠兒齒  
黃髮毫無老態年八十四無疾而終

王宮弼耆賓生平善經商同治回變防守堡寨管理子  
藥軍械存儲有法以濟緩急人皆賴之現年八十二  
身尚強健

何金鐸增生字小峰歲貢生天精之兄歲貢生開玖之  
父光緒間舉鄉飲大賓性誠慤廉退不務伎倆設帳

授徒裁成數百人年八十六猶能閱小楷書手不釋  
卷風格剛強云

魏持國同治回變聯絡四溝民夫率衆拒賊保全一方  
鄉人賴之年八十三無疾而終

劉秉裁字錦堂從九銜幼失怙事母至孝讀書有心得  
涉世束身以論語鄉黨篇為主臬教子孫皆循循有  
規矩年八十八無疾而終

謝宗義為人謹厚自持與世無忤年八十二孫曾繞膝  
無疾而終

劉連珍一生樂易謹飭自好年八十四無疾而終

盧培錦歲貢生幼攻舉業始終不懈年八十四猶終日

伏案作蠅頭小楷里人奇之

楊枝金端龐醇謹與人言笑和霽如春頗有古風年八

十四無疾而終

吳學予字紹宰生平恂恂謹飭義命自安不隨俗俯仰

閭里奉為坊表耄猶康強健步不支年九十一安坐

而逝

鄭敬儒字吉亭質性樸茂工書法生平以農桑自娛勁

直耿介有古遺風晚年耳聰目明學書弗輟年八十

六無疾而終

許世聽年三十二婦歿誓不再娶鰥居五十餘年壽八

十三而終

許清字縈如監生性正直強毅家範嚴肅排難解紛

鄉鄰賴之縣令李予以端風正俗匾額年已七十猶

健步善飯壽至八十一而終

葉志遠歲貢生好學能文年八十餘手不釋卷竟日端

坐且日每書小楷百餘字後以無恙卒里人咸

欽敬之

許述謨年八十九歲以農為業常履畝親閱耕耘無少  
倦色鄉人恒多敬之

劉春昌天性渾厚現年八十一歲猶步履強健

何秀華誠實無偽現年八十一歲猶耳聰目明

馬理倉心性耿直現年八十一歲猶神氣清爽

謹案吾讀禮經養老之文見夫三代盛時民風樸  
茂高年碩德序齒於上下庠釋奠於東西序典制  
輝煌未嘗不歎鄉飲酒之禮極隆且重也然天子  
酒醴宴饗有司歲時存問凡茅簷蔀屋中耆民逸

老中咸含和吐氣蔚為熙朝人瑞者無非天地祥  
和所鍾毓國家仁澤所栽培時至晚近雖羲皇之  
年不可高話而日月常在百歲尚有百歲人故入  
桑梓邦內見有皓首龐眉曳杖逍遙猶令人睪然  
高望想見太平景象登斯民於仁壽之域低徊不  
能去

續修鎮番縣志卷之九

人物列傳下

列女

柴貞女字郭勣未于歸勣亡女衰麻往弔不復返守貞七十二歲卒

王烈女小字福迎農家女也字楊某未歸本族土豪某強聘之遣媒妁唆其父悔婚父聽之迎婚有日女知之潛往河干沈水溺死家人救屍出面色如生所著衣裳縫紉細密不可解

續修鎮番縣志

卷九

人物列傳下

一

馬烈女小字齡齡馬坤德之女回匪亂家人倉皇出走女取膏車脂塗面作醜狀攜弱妹並幼弟潛避廢廬中繼思搜獲難免遂合毒藥給弟妹共飲之及賊入室弟妹已暈絕倒地女尚存活哭罵賊賊強扶馬上女急取袖刀深刺入喉血濺衣領而死

張烈女裕國之女年十六未字同治丙寅寇至寨陷搜女夾壁中牽之出一賊將犯之女堅拒不從賊復威脅女以掌摑賊面復唾之哭失聲賊怒磔死

馬氏生員劉迪善妻迪善歿有遺腹冀生男以承祧及

產女心已絕望俟姑離床遂觸壁死時年二十三前  
清光緒間旌

李氏生員聶之炯妻之炯歿氏剪髮納夫袖入殮後絕  
粒數日遂自盡時年十九歲

李氏潘發魁妻發魁歿含殮已畢即絕飲食累日仰藥  
自盡時年二十四歲

張氏劉作乾妻作乾病親侍湯藥衣不解帶越兩月夫  
歿誓以身殉及葬臨穴投壙氣幾絕舁之歸不食而  
卒時年二十二歲

張氏高天嵐妻天嵐歿即不食累日將殯遂仰藥自盡  
時年二十一歲

趙氏郭鳴儀妻鳴儀病永訣時氏悲傷痛絕僵卧其側  
手入爐火不覺既甦皮膚已焦灼糜爛矣夫棺將掩  
聲嘶氣盡而亡時年三十一歲

潘氏李逢塾妻逢塾歿子女俱無治喪畢氏飲泣嗚咽  
氣息奄奄五旬而卒時年一十九歲

孫氏劉創業妻創業歿氏哭不絕聲三日不食服毒卒  
劉氏丁振南妻振南歿哭泣盡哀六日不食而死

張氏李永學妻永學病篤氏先飲鴆待斃以至同死家人遂合葬焉

聶氏何開藻妻開藻歿氏俟含殮已畢哭泣盡哀遂仰藥以殉時年一十八歲

右十五人殉夫以烈著

柴氏生員薛世表妻同治回亂氏攜孤匿水洞中被賊搜出將掠子去氏奔救大罵遂被害時年三十六歲  
劉氏高廷佑妻回變寨陷賊紛掠子女將嚇以相從氏失聲大罵賊怒被鎗死

張氏貢生馬錫侯妻同治八年寨陷家人被害賊威脅相從氏厲聲唾罵遂被擊死

何氏謝毓楓妻毓楓歿年二十誓志撫孤同治九年寨破氏縱火自焚

樊氏柴耀書妻歲貢翔鳳母年五十三值回亂有媳三人均殉難氏被傷未絕遂投井死之

張氏陳興泰妻同治九年寨陷氏見逆回奸邪白晝宣淫恐被玷污遂墮垣死之

張氏庠生李承曾繼妻年二十六承曾歿撫二孤成立



同治五年諸子在外賊圍村縱火延燒氏見火光觸天遂自經時年四十七前清宣統三年旌

薛氏周世祿妻同治九年賊攻寨陷之婦女多被擄掠氏倉皇無措急投井死之

樊氏石尚敬妻年二十九尚敬歿撫孤成立守節數十年同治回亂寨將陷氏先服毒而死

王氏周繼往妻年十八繼往歿無子撫姪為嗣守節五十七年適回亂寨破氏觸牆而死

曾氏王有功妻年二十餘於同治回變因生母病篤氏

親往視之既至次日堡失守因有腿疾勢難遠去恐被賊辱遂投井而死

梁氏童生李得成妻年二十二得成歿無子母勸改節氏不可泣告其姑曰母惟憐吾無夫使適人吾獨憐夫無子將墜宗乃撫夫姪為嗣苦貞十餘載嗣回亂寨陷綁氏馬上行里許氏罵不絕口自墜馬下賊怒盡折其齒旋被槍死

右十二人殉回難以烈著

唐氏詹有德妻年二十有德歿子幼翁姑以媳年穉恐

改節嘗使人探其意氏泣曰吾夫早逝既棄父母不能終養九泉有餘恨焉遂咬指血以自誓奉親撫孤守貞三十九年卒清道光二十一年旌

毛氏監生唐俊士妻年二十八夫歿子幼氏見翁姑抑鬱知為已憂氏竭力奉養曲意承歡遂矢志守貞四十二年卒清道光二十一年旌

李氏武生羅雲青妻年二十六夫歿子甫七齡翁對姑謂孫曰俟孫長大能養其母吾心始慰氏聞之泣曰翁姑喪子不自憐承歡無人轉望孫以養媳吾固知

言之悲且痛敢告翁姑誓不二心請勿戚孝親撫孤始終不懈守節三十五年卒清咸豐四年旌

張氏侑生常大儒妻年二十三夫歿姑老家貧子幼弱氏以針指度日克勤紡績艱苦萬狀事畜兩全守節一十八年卒清咸豐四年旌

張氏李天擒妻年二十五夫歿有田數畝無資覓工氏憐翁姑操作嘗襁負其子向隴刈麥養老育孤孝慈兼盡守節三十五年卒清咸豐四年旌

景氏安弼國妻年二十八夫歿子幼姑老家計又艱族

人欲借嫁婦養姑以漁利者氏廉得其情遂斷髮燃灰塗夫木主以誓無他其謀乃止厥後姑歿子長終以克家守節二十二年卒清咸豐四年旌

安氏童生楊則元妻年二十五夫歿家貧子幼氏藉鍼黹以奉孀姑遂撫子作文入庠守節四十七年卒清光緒二十六年旌

魏氏柳克讓妻年三十夫殉回難翁姑以兵歲交困時艱於食氏紡織撫孤守節三十六年卒清光緒二十六年旌

馬氏廩生俞凌香妻年十八夫歿子幼姑抱孫泣曰俞氏宗祧僅此一綫將誰恃乎氏曰姑有孫可娛媳有姑可依上下相承必不令呱呱者無母而貽老親憂守節撫孤三十二年卒清宣統元年旌

楊氏王有倫妻年二十七夫歿老翁在堂起坐依人氏扶持奉養不少倦忽一夜翁酣睡嚙語氏聞之驚為呻吟急整衣起視乃夢魘也氏謂子曰無夫之婦困難至此兒其記之守節五十八年卒

周氏郭之道妻年二十三夫歿遺孤二孀姑孱弱不能

操業氏竭力紡績奉姑撫孤不遺余力人謂節孝兩全守貞四十五年卒

楊氏李開科妻年二十六夫歿堂有祖翁室居孀姑氏奉侍維勤不離左右仰事俯畜無忝婦道守節三十一年卒

羅氏陳爾德妻年二十九夫歿姑老子幼氏績綿為業以布易粟撫孤成立守節四十年卒

薛氏王成德妻年二十一夫歿子幼翁姑耕織終歲勤勞氏抱甕灌田引梭抽縷以相佐助終克有成守節

四十二年卒

曹氏馬從耀妻年三十一夫歿遺二子翁姑老耄氏竭力奉養人無間言守貞四十五年卒

謝氏馬理明妻年三十二夫歿無子翁姑蒼白步履維艱氏執巾捧盥奉事唯謹及親歿撫族姪為嗣守節四十五年卒

韓氏張自馴妻年二十九夫歿子幼姑老氏承歡娛志曲盡孝養撫孤興家守節四十年卒

高氏盧 鼈妻年二十夫歿事翁姑以孝聞撫子成立

守節五十餘年卒

韓氏王策僕妻年二十四夫歿子幼翁姑衰老事畜甚艱氏曰與其有田荒蕪坐以待斃不如出租年得數石尚可自給俟兒長成收回利權何憂貧遂從其言守節五十年卒

何氏李得豐妻年二十九夫歿人勸改節氏曰吾去貧富不可知但煢煢二老依誰奉養遂撫夫姪為嗣守節四十二年卒

馬氏石尚榮妻年三十夫歿時值回亂姑孀子幼一日

賊圍村氏隨姑攜子避沙磧叢莽中越宿不食姑掘草充飢氏含乳止渴終獲保全守節五十一年卒

何氏胡世貴妻年二十四夫歿事翁姑以孝撫孤以慈守節三十餘年卒

丁氏白永命妻年二十二夫歿翁老家貧子幼氏事畜老弱始終不懈守節五十三年卒

劉氏吳學賢妻年二十二夫歿事姑撫孤守節五十

年卒

劉氏魏大昇妻年二十夫歿孤幼翁老氏謹守婦道守節五十一年卒

李氏朱士英妻年二十四夫歿上奉翁姑下撫孤子守節三十餘年卒

張氏李元德妻年二十九夫歿子甫五齡氏孝事翁姑撫孤守節五十二年卒

許氏聶康彥妻年三十夫歿姑孀子幼氏泣曰吾應殉夫迨吾死姑將誰依遂撫夫姪成立守節三十五年卒

王氏唐多亮妻年三十二夫歿翁亦繼逝姑老三子一女幼氏孝慈兼盡克成家業守節四十五年卒

張氏楊論文妻年三十夫歿子幼翁姑衰耄氏事老畜

幼艱難萬狀迨後撫孤以興門戶守節三十二年卒右三十人以孝著

朱氏馬騰舉妻年二十夫歿子猶襁褓氏俟祭日族黨咸聚遂抱孤柩前自誓曰吾夫已歿遺體尚在見子即見夫敢有二心乎弔者皆感泣守節三十五年卒清道光二十一年旌

許氏丁鈺妻年十八夫歿子幼姑老常戚戚慮有他志氏窺姑意即毀粧操作曲盡孝養撫育孤兒守節五十四年卒清道光二十一年旌

王氏李天植妻年二十八夫亡家甚窶茹荼飲冰孝奉  
翁姑守節三十五年卒清道光二十一年旌

陸氏李時奎妻年二十三夫亡撫夫侄為嗣藉織紡度  
日鞠育辛勤不少輟守節三十七年卒清道光二十  
一年旌

王氏趙希适妻年二十二夫亡以夫侄自繼族中有利  
氏再醮者氏耳其語置不問或勸之嫁即正色以拒  
終身不通來往守節四十八年卒清咸豐四年旌

王氏馬而玉妻年二十二夫亡家甚窶幾無生計氏日

抱孤兒勤紡織百計醫貧遂守節四十四年卒清咸  
豐四年旌

張氏郭紹禹妻年二十二夫亡子猶襁褓家徒四壁氏  
藉女紅度日撫子成立守節四十九年卒清咸豐四  
年旌

丁氏生員謝葆珣妻年二十四夫亡家貧嘗採薪負米  
畫餅充飢撫子成立守節三十四年卒清咸豐五  
年旌

甄氏生員王玉鐸妻年二十七夫亡子幼翁姑老耄氏  
勤理家事始終不懈守節四十七年卒清咸豐五  
年旌

趙氏周可章妻年二十七夫亡遺孤幼家無長物氏藉女紅竭力撫育守節四十七年卒清咸豐五年旌

張氏廩生馬凌霄妻年十七夫亡生有遺腹子氏竭力撫育教養成人家雖小康並無驕態氣習守節三十四年卒清同治十二年建坊旌

魏氏謝崇遠妻年二十八夫亡家計蕭條門衰祚薄氏事姑撫孤守節五十年卒清光緒元年旌

顧氏張俊文妻年二十八夫亡子甫數齡家貧藉針指度日撫孤成立守節三十八年卒清光緒四年旌

柴氏何天錫妻年十九夫亡家無旁親薪米維艱氏忍飢紡織嗣撫孤成立守節五十六年卒清光緒十一年旌

趙氏閔得彪妻年二十七夫亡子幼氏事翁姑以孝聞守節五十二年卒清光緒十六年旌

汪氏胡創業妻年二十二夫亡氏撫孤克緒成立守節三十八年卒清光緒十七年建坊旌

張氏盧法河妻年二十八夫亡子幼翁姑衰老氏事親撫孤守節四十三年卒清光緒二十年旌



王氏張國誌妻年二十六夫歿回難氏因尋夫骨逃入叢林中不食五日賊退得屍殯葬遂撫孤成立守節三十二年卒清光緒二十三年旌

馬氏許守準妻夫殉回難氏年二十一恐被賊污自焚其髮用炭塗面賊棄之撫遺腹子德明成立入庠守節三十二年卒清光緒二十三年旌

張氏謝文馨妻年二十二夫亡撫孤成立守節五十年卒清光緒二十四年旌

李氏謝日章妻年二十八夫亡撫孤守節五十九年卒

清光緒二十四年旌

郭氏謝殿存妻年三十夫亡撫孤守節三十九年卒清光緒二十四年旌

李氏王錫瑜妻年二十二夫亡子僅七齡家貧氏以紡織度日守節三十九年卒清光緒二十五年旌

馬氏王永遠妻年二十六夫亡衣食維艱氏藉女紅撫孤成立守節四十五年卒清光緒二十五年旌

謝氏高天衢妻年十九夫亡氏閉戶撫孤足不出閨闔者十餘年撫孤成立守節五十三年卒清光緒二十

五年旌

何氏謝雙魚妻年二十六夫亡子幼氏撫孤成立守節四十七年卒清光緒二十五年旌

郭氏馬椿壽妻年二十一夫亡子幼祖姑衰老氏撫孤成立守節二十八年卒清光緒二十五年旌

甘氏景大射妻年二十八夫亡家貧氏竭力育孤成立守節三十年卒清光緒二十六年旌

薛氏謝雙運妻年二十二夫亡家貧氏撫孤子克成家室守節四十二年卒清光緒二十六年旌

李氏儒童康掄元妻年二十二夫亡饔飧不給無以餬口氏晝夜紡績撫孤成立守節五十一年卒清光緒二十六年旌

王氏楊德源妻年十九夫亡撫孤興家內外整潔守節二十一年卒清光緒二十六年旌

張氏楊以杰妻年二十七夫亡子髻齡氏紡績佐讀終至成立守節四十二年卒清光緒二十六年旌

張氏王秉亭妻年二十九夫亡姑老子幼營生無計氏勤於紡織撫孤成立守節四十八年卒清光緒二十

九年旌

方氏王永賢妻年二十七夫亡子方九齡氏令束髮受書每至塾歸必使手執讀本親指句讀人皆謂有孟母風守節四十八年卒清光緒二十九年旌

兆氏趙志昂妻年二十七夫亡撫夫侄為嗣飲食教誨如同已出守節二十年卒清光緒二十九年旌

石氏李承銘妻年二十八夫亡家貧恆日夕不舉火有娘親以再醮挑之氏正言拒之遂終身不與來往守節三十二年卒清光緒二十九年旌

王氏高思融妻年二十七夫亡撫孤讀書成立守節四十年卒清光緒二十九年旌

李氏邱隱書妻年二十三夫亡值歲飢氏糞菜根和糠竅朝夕餬口撫孤成立守節五十四年卒清光緒二十九年旌

趙氏魏向党妻年二十八夫亡舅氏欲奪其志氏怒泣曰人無二天我豈事二夫乎遂撫孤成立守節三十二年卒清光緒二十九年旌

韓氏武朝佐妻年二十九夫亡子幼家貧無依勤女紅

自給守節二十八年卒清光緒二十九年旌

姜氏張生財妻年二十一夫亡兵亂歲荒人疲奔命氏蓬首垢面身披敗絮足裹馬革負子逃竄終以兩全守節六十七年卒清光緒二十九年旌

孟氏韓學義妻年十九夫亡子亦殤撫夫姪為嗣孝事翁姑以續宗祧守節三十六年卒清光緒二十九年旌

葉氏劉泗妻年二十七夫歿新疆遺子三家貧氏藉紡績撫養諸兒嗣因長男死回難次子往尋父屍中道殞殂僅撫一子以綿宗嗣守節五十餘年卒

姜氏潘凝仁妻年二十四夫亡遺子一杜門不出惟課

女紅布衣荆釵撫孤守節三十六年卒清宣統元年旌

趙氏張蓬山妻年二十五夫亡無子時夫弟得善甫三

齡翁年逾花甲氏矢志守節事翁姑撫弱弟繼以得善之子永修為嗣今得善官新疆知事永修仕本省檢察廳檢察官氏現年七十五歲清宣統二年旌

劉氏李修文妻年二十七夫亡子幼矢志撫育守節三十年卒清宣統三年旌

王氏李承瑞妻夫客歿甘泉氏年二十九二子俱幼聞

訃泣殉時翁姑垂白力勸慰之遂紡績奉親為子娶室嗣媳歿撫孫寢食相依衣履皆出自氏手劬勞顧復養成偉器即今己酉拔貢生委任孔廟奉祀員慶元也苦貞四十一年卒

王氏李葵香妻年二十九夫客商歿外氏紡織代耕教子成人守節五十餘年清宣統三年旌

馬氏王朝恩妻年二十夫亡氏忍痛撫孤得入武庠守節三十九年卒

高氏常作楨妻年二十四夫亡氏毀容斷髮矢志撫孤

守節五十年卒

李氏張宗海妻年二十五夫亡撫孤士文成立守節四十八年卒士文歿妻李氏年十九遺子週歲矢志靡他守節四十八年卒

劉氏李俊國繼妻夫殉回難氏年二十九撫前室子愛如已出守節四十五年卒

王氏陳朝江妻年二十六夫亡遺子幼弱氏衣粗食糲孤貧自甘守節三十年卒

周氏儒童孫述統妻幼讀書頗嫻閨訓年二十五夫亡

遺孤五齡氏鞠育膝下不稍姑息嗣以弱冠入庠為諸生守節三十九年卒學憲胡以敬姜德教表其門李氏張世禧妻年二十夫亡家貧撫孤備嘗艱辛守節四十四年卒民國六年旌

唐氏李培儒妻年二十七夫亡時逆回變亂氏撫孤逃難危險萬狀後子歿又撫二孫成立守節四十六年卒

杜氏胡浩菴妻年二十六夫亡遺孤三月氏撫育成童得人邑庠守節七十一年卒

張氏張健鳳妻年二十九夫亡二子尚幼家計蕭條針

指度日遂克成家守節三十八年卒

馬氏丁萬文妻年三十二夫亡姑孀子幼事畜維艱氏以女紅謀生撫孤成立守節三十七年卒

姜氏郭之豐妻年二十九夫亡守節三十七年卒

張氏吳繼業妻年二十六夫亡家貧撫孤守節四十七年卒

甘氏王親賢妻夫從戎陣亡氏年二十七遺子二氏紡績撫養次子入武庠人皆稱之守節三十八年卒

張氏王時厚妻年二十八夫亡孝事翁姑慈育幼子守

節六十二年卒

楊氏生員吳柏林妻年二十二夫亡氏撫夫姪成宗為嗣旋入武庠守節三十八年卒

李氏生員吳舒文妻年二十八夫歿孝奉衰姑撫孤成立守節二十八年卒

王氏武生樊維綱妻年二十五夫歿孝事翁姑撫孤景元中式武舉希元官千總守節三十八年卒

柴氏樊永泰妻年二十夫亡翁姑愛憐幼孫不稍譴訶氏嚴加約束得入邑庠守節三十一年卒

楊氏生員季附青妻年二十八夫亡家奇貧氏勤紡績茹荼無艱不歷守節終身

劉氏生員趙映魁繼妻年二十二夫亡撫前室子如己出飲食教誨撫育成立守節三十九年卒

聶氏何 變妻年二十一夫歿子幼氏矢志撫孤守節三十一年卒

李氏武生程鳳舞妻年二十九夫殉回難氏矢志撫孤冀終餘年後子亡撫夫姪為嗣守節三十三年卒

周氏武生韓克明妻年二十九夫歿子有鳳年甫舞勺

氏教訓之嚴不殊嚴父後有鳳中式武舉守節四十六年卒

郭氏舉人趙生茂妻年二十四夫歿撫孤成立備歷艱苦後子亡瑩瑩無依遂就養孀家苦節五十五年卒  
石氏生員裴秀元母年二十七夫亡秀元年已成童氏督責甚嚴後子入泮克光門庭守節六十年卒

劉氏生員許學綿妻年二十七夫亡家貧子幼氏撫孤成立守節三十七年卒

李氏監生劉淑繼妻年二十八夫亡撫前室子耀煒

入庠嗣耀煒歿姑媳孀居又撫孫源漢入庠食餼守節三十餘年卒

張氏馬在治妻年二十五夫亡子幼鄰媪挑之欲令改嫁氏正言拒之遂撫孤成立守節三十餘年卒

王氏嚴源清妻年三十夫偕兩弟殉回難翁姑耄耄氏孝事雙親督課子姪均至成立守節五十二年卒

高氏李達裔妻年十九夫亡撫遺腹子守節三十年卒  
郭氏馬世璪妻年二十八夫亡子猶襁褓氏矢志守節垂四十餘年卒



楊氏郭明序妻年二十九夫亡無子遺一女氏貧苦自  
甘守節五十年卒

何氏郭 鎧妻年二十八夫亡撫夫姪為嗣課耕課讀  
終以克家守節三十九年卒

魏氏李德科妻年二十八夫亡撫孤娶室嗣又子亡媳  
白氏年二十九奉姑教子兩世孀居姑守節四十二  
年卒媳守節三十四年卒

王氏高廷佐妻年二十九夫亡撫孤入庠守節三十餘  
年卒

李氏景兆裕妻年二十九夫亡家極貧氏藉紡績撫孤  
成立守節三十六年卒

王氏姜學書妻年二十七夫亡家貧課女紅積貲餬口  
守節四十二年卒

馬氏劉曉禮妻夫西遊天山氏年二十六及撫二子成  
立音信全無氏日夜哭泣望夫歸里卒未還苦守四  
十九年卒

吳氏何能藝妻年二十八夫亡孝事翁姑撫遺腹子成  
立後子亡又撫夫姪承祧守節四十餘年卒

薛氏蔣生財妻年二十五夫亡撫孤成立守節四十八年卒

李氏任天顯妻年二十夫亡家貧撫孤成立守節四十六年卒

康氏任天選妻年二十九夫亡奉翁姑撫幼子守節五十年卒

何氏王人紀妻年二十二夫亡子幼值回亂氏遇賊強脅罵不絕口賊怒手刃肢膚委之溝壑氣幾絕家人舁之歸乃甦守節二十六年卒

李氏樊玉起妻年十九夫亡姑孀子幼氏藉織紡縫紉上事孀姑撫子永貞入庠守節三十八年卒

何氏張崇有妻年二十六夫亡家貧氏勤於女紅撫孤成立守節二十六年卒

楊氏祁鴻躋妻年二十一夫亡撫夫姪為嗣守節三十九年卒

常氏祁天元妻年三十夫亡氏撫夫姪為嗣姪亡復撫族孫成立守節三十九年卒

沈氏王得瑞妻年二十六夫歿撫遺子娶室子亡媳亦

青年兩世孀居內外無間姑守節三十年卒媳守節四十六年卒

陳氏辛培本妻年二十一夫亡撫夫姪為嗣守節三十六年卒

謝氏侑生許綸基妻年二十四夫亡撫前室子教養兼至人無間言守節四十一年卒

方氏許培田妻年二十二夫亡撫夫姪為嗣守節五十二年卒

祁氏劉汶繼妻年二十九夫亡撫夫姪為嗣守節五

十三年卒

王氏王絲綸妻年二十八夫亡撫養遺孤矢志堅貞守節四十二年卒

郭氏潘永命妻年二十七夫亡家貧子幼氏女紅自給守節四十年卒

邱氏趙毓英妻年二十夫亡子幼氏紡績禦貧撫子成立守節四十年卒

蔣氏朱其河妻年十九夫亡撫孤醫貧艱辛萬狀守節五十餘年卒

魏氏連逢福妻青年夫亡子猶匍匐人皆謂其改節氏持齋禮佛遂以終身

張氏羅文燦妻年二十七夫亡子稍長氏竭力紡績終歲不輟撫子成立守節四十年卒

姜氏張兆南妻年二十四夫亡族人欲奪其志氏截髮自誓孝姑撫子終以成立守節四十年卒

趙氏張生潤妻年二十六夫亡遺錢二十緡氏以子幼寄母家以營息惟藉針指撫孤成立守節四十年卒

景氏王曰春妻年二十七夫亡時遭回亂氏撫孤養育

艱難萬狀守節四十餘年卒

何氏潘生芝妻年二十夫亡歲大饑斗米數串氏勤苦

自給撫孤成立守節四十二年卒

竇氏段容德妻年二十七夫亡氏上事翁姑撫幼子成立守節三十二年卒

李氏袁發明妻年十六于歸甫數月夫客遊西域久未歸氏撫夫姪為嗣守節四十八年卒

王氏蔣福德妻年十九甫生子夫遊幕新疆氏撫孤弄孫年已花甲嗣聞夫音使子往尋數次未歸氏已絕

望後父子俱歿關外撫孫成立守節五十八年卒  
何氏石尚性妻年二十七夫亡撫孤成立守節四十一年卒

楊氏石存猷妻年二十八夫亡撫孤成立守節四十餘年卒

徐氏聶毓詩妻年二十四夫亡撫子娶室後子殉回難  
媳許氏年三十無子撫嗣子成立姑守節四十六年  
卒媳守節三十年卒

徐氏石民安妻年二十七夫亡氏撫孤入武庠守節三

十六年卒

徐氏李中峙妻年二十夫亡子幼氏矢志靡他守節四十餘年卒

潘氏張含揚妻年二十夫亡子幼繼姑在堂氏謹守婦  
道事姑撫孤守節四十四年卒

唐氏趙靖安妻年十八于歸甫三月夫赴西域遂歿人  
勸改嫁氏正言拒之遂撫夫姪為嗣克成家室守節  
五十五年卒

白氏劉伯義妻年十九夫亡氏撫夫姪為嗣守節四十

五年卒

段氏黃 恆妻年三十夫亡家貧子甫成童氏藉紡織撫孤成立守節三十五年卒

李氏陸盈科妻年二十夫亡遺孤二氏紡織度日督課二子不稍寬假後二子入邑庠里人賢之守節五十六年卒

王氏韓有雁妻年二十八夫亡撫夫姪為嗣成立守節二十五年卒

裴氏韓兆銓妻年二十夫亡孤幼氏女紅自給守節五

十三年卒

楊氏李逢時妻逢時棄家修行華山氏年二十四無子泣留不顧嗣以望夫念切聞人有赴長安者即供衣履以為常然夫修養心性終不歸氏孝奉翁姑苦守三十八年卒

景氏王培倫妻年三十夫亡時值回亂氏攜子奔逃艱難萬狀撫孤成立守節三十年卒

多氏侍得典妻年二十一夫亡遺腹生子撫養成立子亡媳吳氏青年寡居矢志靡他姑年六十六卒媳年

亦如之人稱同節同壽一門兩難

魏氏丁世祿妻年二十五夫歿撫養夫姪以續宗祧守節五十年卒

王氏陳常泰妻年二十八夫歿撫夫姪為嗣入邑庠守節四十九年卒

李氏生員唐廷佐妻年二十八夫歿以夫姪承祧氏勤紡織課子耕讀守節三十年卒

方氏王敦勤妻年二十五夫歿生遺腹子甫七齡即令入塾氏嚴加訓課不稍姑息撫子入庠食餼守節四

十三年卒

孫氏辛培善妻年二十一夫歿撫夫姪順元成立守節六十七年卒

盧氏王塘紀妻年二十四夫歿子殤撫夫姪成立守節四十二年卒

王氏張廷琦妻年二十八夫歿撫孤成立守節三十

年卒

王氏何夢鵬妻年二十五夫歿無子氏泣以身殉族人勸立夫姪為嗣遂紡績禦貧撫養成立守節三十二年卒

韓氏馬復運妻年二十九夫歿遺一子氏以機杼為業  
令子作傭餬口遂以成家守節二十二年卒

王氏田有德妻年二十七夫亡氏孝事翁姑撫孤入庠  
守節四十年卒

潘氏孟學儒妻年二十六夫亡家貧氏藉針黹撫孤成  
立守節三十八年卒

白氏何其義妻年二十三夫亡家貧紡織營生撫孤成  
立守節三十餘年卒

魏氏范如惠妻年二十三夫歿西域噩耗至或勸之嫁

氏正言拒之撫子成立孫曾繞膝苦節五十八年卒

李氏王紀綸妻年二十九夫亡於陣撫遺腹子成立守  
節五十年卒

徐氏吳養年妻年十九夫歿撫遺腹子成立守節六十  
餘年卒

李氏周國信妻年二十五夫歿西域撫幼子大修紡織  
度日守節三十五年卒

李氏黃文德妻夫陣亡西域氏年三十聞耗斷髮自誓  
撫孤娶室後令子尋父骨遇賊死之媳李氏年二十



遺一子姑媳鞠育繼又歿於西地復撫族姪為嗣遂以終身姑年八十二卒媳年六十二卒

周氏謝毓梅妻年三十夫歿撫孤成立旋死回難又撫夫姪為嗣守節四十三年卒

姜氏謝練武妻年二十四夫殉回難撫子樹棠成立入邑庠守節三十年卒

孫氏楊毓滙妻年十五于歸未週歲夫亡母勸再醮氏不從乃撫夫姪為嗣守節三十二年卒

鄧氏楊文潤妻年二十九夫歿遺子幼氏藉紡織積貲

課讀撫孤成立守節二十五年卒

桂氏楊作謨妻年二十四夫歿撫夫姪為嗣守節三十二年卒

李氏王興田妻年二十九夫亡無子母欲奪其志氏剪髮自誓撫夫姪為嗣守節三十七年卒

馬氏丁萬文妻年三十夫歿孝事孀姑撫孤成立守節三十餘年卒

周氏唐國清妻年二十四夫歿無子撫夫姪為嗣守節四十二年卒

田氏盧逢言妻年十九夫死回難氏攜子奔竄坎坷萬  
狀遂守節五十三年卒

馬氏陸樹科妻年十九夫歿氏以翁姑耄耋洗盥縫紉  
俱以身任撫夫姪成立守節三十四年卒

祁氏杜向舜妻年三十夫被回難氏紡績縫紉撫孤克  
成家業守節五十四年卒

田氏康盛義妻年三十夫歿即撫族姪課讀經商終成  
令器守節四十五年卒

何氏傅植遠妻年十九夫歿撫夫姪思孔束髮入塾旋

列膠庠思孔卒無子氏又撫族孫成立守節六十餘  
年卒

石氏郭 晟妻年二十五夫歿遺孤六齡氏藉紡織撫  
孤成立守節三十餘年卒

馬氏吳時新妻年二十九夫歿子幼氏藉女紅撫孤成  
立守節三十一年卒

魏氏曹雲茂妻年二十八夫歿氏經營家業寒暑不輟  
撫子成立守節三十年卒

閔氏朱貞明妻年三十夫歿子幼家貧氏藉針指以養

孤兒守節三十年卒

李氏魏鍾鎬妻年二十三夫死回難氏抱子奔逃歷盡艱難遂撫孤成立守節四十餘年卒

魏氏楊廷蒞妻年二十八夫歿子羸弱多病氏經營調劑撫子成立後家業克興守節三十三年卒

朱氏李足本妻年二十九夫歿子幼歲飢貧不聊生氏以女紅自給撫子成立守節三十一年卒

唐氏陳興佑妻年二十五夫歿氏竭力撫孤紡績度日及子成立猶勤勞不輟守節四十八年卒

續修鎮番縣志

卷九

人物列傳下

三十

張氏陳爾緒妻年二十三夫殉回難僅遺一女撫夫姪為嗣授室成人守節五十五年卒

潘氏張鼎甲妻年二十六夫死回難子幼氏撫子避難歷盡苦楚守節四十年卒

亢氏馬序壽妻夫死回難氏年二十五遺孤幼弱氏於亂離中撫孤成立守節三十二年卒

張氏丁祿生妻年二十六夫歿遺腹生子氏矢志撫孤守節五十七年卒

趙氏張瑞俊妻年二十九夫歿遺二子俱幼弱氏勤女

紅養育二子成立守節三十餘年卒

李氏李育菀妻年二十七夫歿子幼家貧氏敲針度日  
撫子成立守節四十餘年卒

王氏李敷春妻年十七于歸甫有孕夫即歿氏晝紡夜  
績勞而不怨後生子撫育成入守節五十八年卒

徐氏李宗友妻年二十七夫歿子髻齡家貧氏躬操農  
事撫子成家守節五十一年卒

劉氏吳富文妻年二十四夫歿子僅成童值歲饑氏紡  
織餬口撫子成人守節四十年卒

王氏王述茂妻年十九夫歿子幼家貧氏紡績自食撫  
子成立守節三十五年卒

魏氏唐肅生妻年二十八夫亡子幼讀貧無學費舅氏  
常助貲勵學氏撫子成立守節六十年卒

魏氏高發奧妻年二十八夫歿子甫十齡日用艱難氏  
紡績營生守節四十二年卒

馬氏丁組文妻年二十二夫歿子幼值回亂大軍雲集  
氏恐遊勇見面被污忍飢避匿率以為常撫子成立  
守節四十二年卒

聶氏何天經妻年三十夫歿無子遂撫夫姪為嗣守節四十五年卒

王氏多育範妻年二十二夫歿子幼氏撫孤成立守節四十二年卒

石氏王有則妻年二十三夫歿時回亂猖獗舅姑避難氏攜子追隨無少倦色迨後逆回平靖事親撫孤守節四十五年卒

謝氏汪生林妻年三十夫被回難氏事奉翁姑撫孤成立守節四十四年卒

陳氏王偃紀妻年二十夫歿姑孀遺二子俱幼氏紡織代耕針指度日茹苦含辛守節四十年卒

魏氏聶苞彥妻夫殉回難遺子女六七人家貧如洗令長子長庚營商兼讀氏紡績自給守節三十餘年卒  
趙氏潘信仁妻年二十七夫歿氏孝奉翁姑撫孤成立守節五十年卒

高氏李含香妻年二十八夫歿氏毀容紡績撫孤成立守節五十年卒

劉氏邱發沂妻年二十八夫歿子幼翁姑亦相繼而逝

氏晝耘夜績守節四十四年卒

胡氏劉向玥妻年二十九夫歿誓志撫子成人既子歿撫族孫以續宗祧守節四十年卒

王氏劉永培妻年二十九夫亡撫夫姪為嗣藉針指度日守節三十八年卒

王氏柴耀高妻年二十七夫歿撫夫姪為嗣守節四十二年卒

潘氏生員趙炳甲妻年二十六夫歿親老子幼氏矢志靡他孝事翁姑撫孤成立守節三十七年卒

續修鎮番縣志

卷九

人物列傳下

三十三

王氏陳有造妻年二十九夫歿撫孤成立守節四十四年卒

謝氏劉謨善妻年二十四夫歿氏女紅自給拮据萬狀撫二子成立守節四十三年卒

劉氏謝殿芳妻武生鳳洲母年三十夫殉回難氏撫遺孤入武庠守節四十六年卒

侍氏王所品妻年十九夫歿無子門衰胙薄氏孤貧自甘守節四十五年卒

李氏王之紀妻年二十四夫歿撫夫姪所謀為嗣入邑

庠守節四十五年卒

陳氏王義德妻夫歿西域氏年二十五無子孤燈寒窗  
久待不歸苦守四十年卒

何氏王為德妻年二十三夫歿西域無子氏撫族姪為  
嗣守節四十年卒

劉氏程破臉妻年二十八夫歿家貧撫子志源三十五  
歲歿媳楊氏年三十矢志撫孤劉年七十三卒楊年  
五十六卒

汪氏生員王昌運妻年二十八夫歿無子氏撫夫姪為

嗣守節六十年卒

胡氏富正南妻年二十九夫歿翁老子幼氏敬事老翁  
撫孤成立守節四十一年卒

李氏陳廷旄妻年二十八夫歿長子六齡次子遺腹氏  
矢志靡他撫育二子成立守節四十五年卒

范氏李賓德妻年二十八夫歿無子撫夫姪為嗣守節  
四十年卒

李氏劉鼎漢繼妻年二十九夫歿家貧撫孤成立守節  
三十四年卒

許氏劉昌耀妻年三十夫歿無子苦節三十年卒

邱氏張繼厚妻年三十二夫歿撫夫姪為嗣守節五十年卒

多氏李蘊文妻年二十四夫歿西域遺孤幼氏孝翁撫孤守節二十一年卒

劉氏湯應澤妻夫殉回難氏年二十三遺子幼氏撫孤成立守節四十餘年卒

趙氏陳爾德妻年二十九夫歿姑老子幼氏事奉孀姑撫孤守節三十六年卒

甄氏王篤志妻年二十八夫亡撫孤成立守節五十九年卒

趙氏軍功王德耀妻年二十八夫歿撫二子成立守節三十二年卒

白氏何九來妻年二十三夫歿於軍氏事翁撫孤守節四十九年卒

王氏盧枝藤妻年二十七夫歿遺孤週歲氏晝為人澣衣夜勤針指撫子成立守節三十二年卒

馬氏從九銜馬服采妻年二十八夫歿遺孤八齡氏孝



事翁姑撫孤成立現年七十一歲

魏氏王濬紀妻年二十八夫歿遺孤六齡氏撫子入邑  
庠守節四十二年卒

楊氏甘繼賢妻年二十六夫歿母勸改嫁女不從遂孤  
貧自勵苦節三十四年卒

王氏劉 澹妻年三十夫歿氏撫二子成立守節四十  
三年卒

馬氏王興和妻年三十夫歿氏孝事翁姑撫孤成立守  
節五十二年卒

劉氏馬從三妻年十八夫歿或勸改嫁氏正言拒之守  
節二十一年卒

周氏唐國清妻年二十四夫歿無子孤貧自甘守節三  
十一年卒

周氏黃兆熊妻年三十一夫歿子幼家貧氏撫孤成立  
守節三十三年卒

高氏楊作武妻年二十九夫歿氏撫孤成立守節三十  
七年卒

王氏康其義妻年二十一夫歿氏孝事孀姑撫養幼子

守節三十二年卒

滕氏馬起書側室性至孝氏能得姑歡心年二十九夫歿撫育嫡室子成人守節三十三年卒

李氏盧發潛妻年十六夫歿西域氏撫夫姪為嗣守節五十一年卒

陳氏盧鐸妻年二十三夫歿翁老子幼氏敬以事翁撫子逢樂成立逢樂歿媳閔氏矢志撫孤克承厥續陳守節四十九年卒閔守節三十四年卒

高氏盧逢遷妻夫歿撫子陪山授室成家陪山歿媳張

氏無出繼鶴山次子為嗣姑媳孀居貞操如一後媳卒氏慟失明不一月亦相繼而歿守節三十八年卒

劉氏馬秀文妻年二十七夫往南河口督工遇賊被害

翁老子幼氏孝翁撫孤守節三十二年卒

徐氏李桂庭妻年三十夫歿二子俱幼氏撫二子成立守節三十九年卒

陳氏林順成妻年二十九夫死回難氏紡績課子無殊嚴父撫孤成立守節三十八年卒

李氏郭明倫妻年二十七夫歿氏撫夫姪為嗣守節三

十八年卒

王氏康其禮妻年二十三夫歿氏撫孤成立守節三十餘年卒

李氏朱士英妻年二十二夫歿遺子成科遺腹子發科翁姑以孫幼弱恐媳改嫁常憂慮哭泣氏毀容矢志立誓守節敬事翁姑撫二子授室成人現年六十四歲

陶氏儒童盧錫珩妻歲貢生勤修女年二十夫歿遺子甫週歲家貧孝事孀姑茹荼飲蓼撫子昆山成立現年七十一歲

續修鎮番縣志

卷九

人物列傳下

三十八

魏氏閔得珍妻年二十九夫歿家貧氏勤理井臼不稍懈怠撫夫姪為嗣現年六十一歲

張氏員外郎馬服綏妻年二十八夫歿遺孤墾鑿甫七齡家雖小康氏荆釵布裙無驕態習且孝事翁姑撫育墾鑿成立前清墾鑿指分新省知府因親老未仕張氏現年六十五歲民國八年褒揚

胡氏唐仲遠妻年二十四夫歿氏躬親紡績勤理家政撫孤多鰲成人貿易甘泉家道漸豐氏猶淡泊自甘不稍奢侈現年七十三歲民國八年褒揚

何氏王以林妻年二十一夫歿家貧藉鍼指度日撫遺腹子成立守節四十年卒

楊氏張世貞妻年二十夫歿苦志守貞撫孤成立守節五十六年卒

趙氏生員湯文典妻年二十九夫歿無子言行不苟守節四十年卒

劉氏王以忠妻年二十六夫歿家貧力勤紡織撫夫姪為嗣守節三十二年卒

亢氏盧攀枝妻年二十六夫歿家甚貧勤紡織撫孤成

立守節五十年卒

陳氏王存祿妻年十九夫歿苦志守貞撫孤成立守節五十年卒

焦氏盧枝槎妻年二十七夫歿西域撫兩孤課讀克成家業守節四十四年卒

陳氏湯効典妻年三十夫殉回難力勤紡織撫孤成立守節四十一年卒

劉氏監生許敦和妻年二十九夫殉回難撫孤成立守節四十五年卒

何氏謝雙金妻年二十八夫歿憂勤惕厲撫孤成立守節五十五年卒

張氏聶九卿妻年二十二夫歿苦志守貞撫孤成立守節五十六年卒

仲氏邱發藥妻年二十八夫歿家貧力勤紡織撫夫姪為嗣守節三十一年卒

趙氏李逢塢妻年二十五夫歿撫孤成立人不堪其苦壽八十四歲卒

王氏馬理麒妻年二十三夫歿家貧藉鍼黹撫孤成立

守節五十年卒

蕭氏馬永桂妻年二十三夫歿子幼有勸令再適者氏面斥其非撫孤成立苦節五十二年卒

李氏多儉妻年二十七夫殉回難撫夫姪成立守節四十二年卒

周氏李報德妻年二十九夫歿女工度日撫孤成立守節四十年卒

蔣氏方茂楨妻年二十八夫歿家貧力勤紡織撫二子皆成立守節四十年卒

楊氏陸添瀆妻年三十夫歿無子姑歿遺夫弟添基甫  
七齡家無儲積坎坷萬狀氏勤理手工矢志靡他遂  
撫育夫弟成立守節四十餘年卒

張氏楊兆瑞妻兆瑞赴秋闈歿於道遺子甫三歲氏年  
二十四歲聞夫歿食不下咽立時尋死家人苦勸氏  
矢志靡他恪守婦道善視祖姑撫子成立守節三十  
餘年卒

韓氏楊臨瑞妻年二十五夫歿氏內主中饋善體親心  
尤能工於女紅勤理家政現年五十七歲

韓氏魏向篤妻同治九年九月向篤殉回難氏年二十  
四歲無子撫夫姪為嗣現年七十三歲

謝氏薛世勳妻年二十五夫歿家無營業氏女紅自給  
撫孤成立守節四十餘年卒

張氏武生楊凌雲妻凌雲於同治四年分帶本城練勇  
堵回南河口陣亡氏時年三十歲見夫尸慘裂哭慟  
吞聲耳不聞勸言目不視孤子七日不食卒

王氏張永錫妻永錫留學東洋病歿氏聞耗終日不食  
憂鬱成疾家人覓醫證治氏杜醫不面遂卧床不起

卒年二十一歲

李氏儒童李蒼毓妻文生李得漢女十七于歸蒼毓為正室生子一夫歿氏年二十三歲哀痛傷神形體尪羸叔姑慰婦曰以婦才貌年歲夫復何憂氏即斷絕飲食數日卒計其時距夫歿僅五月耳

李氏丁繼鑫妻年二十七夫歿生子一翁壽逾八旬體羸神憤飲食便溺不能自主氏孝敬不少間食則執筆供匙便則跪履解帶及翁卒辛苦自勵撫孤成丁守節三十三年現年六十歲

右二百六十四人以節著二人以烈著

謹案王化起於閨門女子亦稱人物處家庭萬難之時變故頻生俯仰無依殉夫則吞毒仰藥撫孤則茹蘖飲冰甚至盜賊橫行碎屍以全晚節舅姑子立矢志以養餘年所處愈危所守愈正其境彌苦其志彌堅觀其百折不回冰霜懍懍即揆諸男夫烈士孝子仁人亦不過如是今訪取貞烈節孝依類分列亦以正人心厚風俗為名教綱常之大防云爾

